

ИВАН КОДАНЕВ

**ВОДЗ ЧЕЧЧАН-
УНДЖЫК
АДДЗЫЛАН**



Коданев и.
Воду черан -
унистичк сгдан.
1367

13 01 05 2

С
К 57



Иван
Коданев

25121

ВОДЗ ЧЕЧЧАН- УНДЖЫК АДДЗЫЛАН

Юр-ва иылысь висьтьяс

Коти книжаой
издательство
Сыктывкар 1967



Куратовская
СЕЛЬСКАЯ БИБЛИОТЕКА

*Сиа аслам челядьлы —
Генялы, Танялы да Олялы*

А В Т О Р.

Иван Васильевич Коданёвлён Коми книжнӧй издательствоын петавлісны висътьяс, повестьяс, ӧти акта пьесаяс. «Водз чеччан — унджык аддзылан» — вӧр-ва йылысь сылӧн коймӧд книжка. Таӧдз петавлісны «Югьд войяс» да «Вӧр-ваӧд ветлігӧн» нима гижӧдъяс.

Тайӧ книжкаын кызь кык висът. Гижӧдъясас восьтӧма миян вӧр-валысь аслыспӧлӧс мичсӧ, петкӧдлӧма сійӧс видзны коланлунсӧ. Ӧд пармалы, кӧсйӧ шуны гижысьыс, абу жӧ веськодъ, кодӧ кызди асьсӧ кутӧ, кодӧ кызди мӧвпалӧ, кодӧ мый вӧчӧ.



ЧЕЧЧЫ, ДРУГ, ШОНДИ ПЕТӨ

Аддзылін-ө тэ, кызди петө шонди? Вензыны ог кут, дерт, көнкө аддзылин. Сийө өд петө быд асыв, көть и мортлөн сюсь синъясыс оз казавны тайос быд пөрийө. Мыччыслө сийө төлын

и гожөмын, тулысын и арын. Во гөгөр чөж. Сэтшөм нин сийө чож.

Шонди петөмсянь пуксьө выль лун. Отияслы сийө вайө радлун да шуд, мөдъяслы — уна төждысьөмъяс. Но шонди быдөнөс гажөдө да шонтө. Сэтшөм нин тайө ылыса югыд шарыс.

Шондилысь петөмсө виччысьөны нянь быдтысьяс, чери кыйысьяс, вөралысьяс, көр видзысьяс. Быдөн виччысьөны аслысногөн. Шондилөн лышкыд югөръясыс гажөдөны ныла-зонмаөс, кодъяслы гожся войясыс кажитчөны медся дженъыдөн. Найө дөзмөдөны узьны радейтысьясөс.

— Чеччы, друг, шонди петө! Водз чеччан — унатор аддзылан.

Кымынысь асланым нэмөн ми кывлім тайӧ тӧдса да виччысяна кывъяссӧ. Звиркнитан-чеччан. Тільыштан чусмӧм синъяс. Кӧмасын-пасьтасын, корсюрӧ мыссьыныд вунӧдан. А шондіылдӧн югӧръясыс ворсӧдчӧны нин вугралысь парма весьтын, гильӧдӧны видзвывса дзоридзьясӧс, югдӧдӧны лӧсталысь тыясӧс, варова визувтысь юясӧс.

Со и мыччысис ачыс миянӧс шонтысь-гажӧдысьыс. Кажитчӧ сійӧ ичӧтикӧн, но мича да вынийӧра. Сылысь петӧмсӧ первойясӧн виччысьӧны лӧбачьяс, пӧткаяс. Та йылысь пыр жӧ висьталасны гажа сьылӧмӧн, асланыс кывъяс вылын варовитӧмӧн. Шонділысь петӧмсӧ тӧдӧны черияс, гутьяс, гагъяс. Садьмасны пармаяс, шоръяс, гӧптъяс.

Медся частӧ, дерт, шонді петӧмтӧ аддзылӧны миян мамъяс, кодъяс чеччӧны шондіыскӧд тшӧтш. Аддзылӧны сійӧс и парходзвывса капитанъяс, чери кыйысьяс, кӧр видзысьяс, геологъяс, пуръясьысьяс. Кодсюрӧлы шоча усьлывлӧ татшӧм шудыс, но и найӧ дыр оз вермыны вунӧдны тайӧ серпассӧ, вӧр-ваыслысь садьмӧмсӧ.

Эз ӧтчыдысь, эз и дасысь, а гашкӧ, тысячаысь и мем усьлі шуд нимкодясьны выль лун заводитчӧмӧн. Медсясӧ юяс вылын, вӧр керкаясын либӧ шонді мозыс онялысь бипуръяс дорын, гортсянь ылын. Оз прӧста шуны: этша узян, водз чеччан—унатор аддзылан. И быд пӧрйӧ мем шонді петӧмыс кажитчывліс аслысьямаӧн, код йылысь висьтавны позьӧ унаног и рисуйтны быд сикас серпасьясӧн.

Сійӧс ми аддзам. Шондіӧн ми любуйтчам. Кӧть мукӧд дырийи шонтӧ омӧля—огӧ лӧгасьӧй. Став му шарсӧ сійӧ югдӧдӧ. Татшӧм нин сійӧ, чурки-буди, мортлы и быдмӧгъяслы колантор. Му вылас медся мусаторйыс. Гашкӧ, корсюрӧ куражитчывлӧ, вежонъясӧн оз петкӧд-

лы ассыыс мича чужомбансө, а век жө муса да колана. Друг кодь дона, чой-вок кодь мелі.

Весиг шуштөм война дырйи, кор рөднөй мунымөс талялісны вөрөгъяс, а порок тшыныс вевттывліс шондісө, ми виччысим сылысь мыччысьөмсө, шуд вайөмсө. А кутшөм югыд да лышкыд вөлі шондіыс Победа лунө! Тайөс ми некор ог вунөдөй. И вунөдныс оз позь. Колөкө, тысяча воысь дырдзык кутасны казъывны тувсовъя праздниксө. Сійө вөлі салдатъяслы да батьмамлы муса, виччысяна, колана.

...Шондіыс со садъмөдіс нин вөр-васө. Шызисны, ловзисны гутъяс и гагъяс. Оз узъсыи и мамлы. Кор сійө шойччылө, сөйлө — унаысь ми ог и казъявлөй. Муртса на шонділөн төдса югөръясыс пыськөдчасны пелька идралөм комнатаө, а мамлөн небыд киясыс бара нин мыйкө да мыйкө вөчөны.

Ныв-пиян чеччытөдзыс сылөн и пөсь сөян дась, и вурөма-дөмөма, ставыс местаын. Видзөдлас шонді вылө, жаль чуксавны челядьсө. Ышловзяс, шебралас сьөлөмшөръяссө ассыыс.

Чери кыйысьяс важөн нин кок йылынөсь. Быдөн төдөны: узян тайө медбур кадсө — гортад черитөг локтан. Көть и быд минут чери кыйысьлы өні дона, но оз тай вунөд чөвтлыны узьтөм синъяссө кельыд лөз енэжө, кытчө муртса на петкөдчис бара жө сійө — югыд шонді. Геолог сөйлас юрсө палатка өдзөс костөд, кыс-кыштас вөрса чөскыд сынөдсө и дерт жө чатыртчылас небесалань.

— Эк, мича и луныс лөб. Водздзык ковмас петны туйө. Водз чеччан — ылөдз мунаи, унатор удитан вөчны, аддзывны.

Капитанлы көть джуджыд палуба вылын и көдзыд, но оз майшась. Кыпөдчыштас вывлань шонді, лолыштас морөс тырнас — лы-сьөмыд пыр жө шоналас. Сьөлөм вылад кокныдджык лоас.

Гашкӧ, шондӱслысь петӧмсӧ медся водз казялӧ тундраса кӧр видзись. Ӧд танӱ сылы нинӧм оз саймовт: танӱ абу тшемӧн сулалысь парма, абуӧсь и гӧраяс-кыръяс. Ки пыдӧс вылын моз тыдалӧ ылӧдз гӧгӧр. Лэдзас малича шапкасӧ, дыр любуйтчас синъяссӧ ёрысь, чужӧмсӧ малалысь шондӱӧн. Колӧкӧ, казътылас том кадсӧ, кыдзи первойысь воськовтӱс паськыд тундраӧ. Вуджлӱс из гӧраяс вомӧн, кӧтасьлӱс, вӧйлӱ бузгысь шоръясӧ. Кыдзи лэчыд тӧв чужӧмас тэчис вуштыны позьтӧм чукыръяс.

...Пыр вылӧджык и вылӧджык кыпӧдчӧ шондӱ. Друг, пӧрччы пинжактӧ, жар кутӱс лоны. Найӧс, кодъяс уджалӱсны войнас, либӧ коллялӱсны кадсӧ бипур дорын, шондӱс байӧдлӧ, тшӧктӧ ойбыртны-водны. Он кӧсйы да лӧӧ кывзысьны. Синъясыд асьныс кутасны куньсьыны.

А сйӧ гӧгыльтчӧ аслас тӧдса туйӧд, кытӱ кытшлалӱс нин лыдтӧм-тшӧттӧм во. Некор оз кежлы бокӧ. Оз зурасьлы ни крукасьлы. Вӧчӧ асьыс быдлунъя удж. Сы югӧръяс улын сӧвмӧны-быдмӧны нянь и пуктасьяс, вотӧсьяс и турун, пуяс и кустьяс.

Окота судзӧдны сйӧс кинад, топӧдны морӧс бердад да шуны: дона шондӱ, югдӧд, шонты мушарса став уджалысь йӧзӧс. Быдӧн мед вӧліны шудаӧсь, дзоньви-дзаӧсь. Мед олӧмыс быдлаын вӧлі тэ кодъ жӧ югыд.





*

ЧОЛӨМ, ПАРМА!

Пармаад, майбыр, быдөнлы туйыс восьса. Тшем вөра егыръяс, чөскыд көра дзескыд ягыяс, ылөдз тыдалысь кыз расьяс асьыныс өдзөсьяссө восьтөны ставлы: пöрысьяслы и томьяслы. И некутшөм козин таясь оз корны. Мөдарө, асьныс вердасны-юкталасны тэнө дон босьттөг. Петкөдласны унатор, и бара жө грөш ни көпейка сыысь он мынты. Сөмын кокьясыд медым вөліны ёнөсь да эн дышөдчы. Дышъястө некөн оз радейтны. Вотчысьяслөн, кодьяс медся водз локтөны вөрө, пестер-наберушкаясыс пырджык овлөны тырөсь, а вөралысьлөн — сьөкыдджык нопйыс. Сэн жө унджыктор позьө аддзывны, төдмавны. Водз чеччөмысь пө некодөс на кайөта абу босьтлөма.

Пармасыс немтор повны. Суас кө, шум, тэнө вой, ён коз да ниа пу лэдзасны ас улас узыны, лэчыд төлысь да зэрысь найө видзасны. Көдзыд кө поводдяйс— нодья вөчан, би дорын пөсь паччөрын моз узян. Ылалан кө кытчөкө — шондйыс да пуяслөн лапьясыс индасны, кодарө колө мунны. Горшыд кө косьмө — шорьяс, ключьяс юкталасны, сетасны эбөс. Сэн жө өмидзьяс,

сэтөръяс, чөд-чөдлач асланыс юмов сокөн гөститөдасны. Кынөмыд сямалө — тшак да пув аддзан. Пищалькө сьөрсьыд — сьөла-тарөн верман чөсмасьны. Со кушөм бур пармайд.

Унатор позьө висьтавны и вөрлөн коланлун йылысь. Он аддзы ни өти кар либө сикт, көні эськө вермисны овны пуа көлуйястөг, тьөс-плакатөг. Быд заводын, быд керкаын мыйкө да мыйкө вөчөма пожөмысь, кыздзысь, козыйсь. Миян пармаясын, ягьясын во гөгөр чөж оз куслы уджлөн гор. Паськыд Печораөд, Эжва, Сыктыв, Емва да Мезень юяс кузя тулыссиянь арөдз кывтө вөр. Нуоны пармаса озырлунсө поездьясөн, баржаясөн, пурьясөн.

Тайө өмөй сөмын? Вөрыс не сөмын вердө да шонтө миянөс, но и быд мортлысь нюжөдө нэм помсө. Видзө шорьясөс да юясөс косьмөмысь-кулөмысь. Аслас паськыд йөрьясын дөзьөритө быд сикас зверь-пөткаөс, гырысь и посни лэбачьясөс.

Помтөм мичлун ас пытшканыс видзөны кыпыд ягьяс, зумыш пармаяс. Унаысь найө вежсьылөны: тулысын и арын, гождөмын и төлын.

Уна жө нин вотөс да тшак арнас чукөртөны коми вөрьясысь. Быд сикас зверь куяс да пөткаяс мөдөдөны татысь ылі муясө. Тайө ставыс пармалөн козин.

Волөй арся луньясө вөрө. Кымын тысяча морт ветлө сэтчө вотчыны, лолыштны сөстөм сынөднас, нимкодьясьны вөр-ваислөн аслыссияма мичлунөн. Зэв бур, мый природа радейтысьяслөн лыдыс воысь воө содө.

А мыйта вьльторсө аддзылан сэтысь! Со төдса вөрді. Тані быдмөны сөмын веськыд пожөмьяс. Вужьяссө пыдө суйөмаөсь му пытшкө, юрнысө кыпөдөмаөсь. Ылісянь пожөмьясыс кажитчөны ставныс өткодьөсь. Локтан матөджык, видзөдлан сюсьджыка на вылө, и казялан, мый быд пу мыйөнкө торьялө өта-мөдсьыс. Кыззи му вылын абу кык өткодь морт, сідзи и пуясыд.

Кыпөдчас төв, и пожөмъяс пыр жө заводитасны ваш-көдчыны, первойсө надзөн-надзөн, сэсса пыр ёнджыка. Найө кужоны дыр кад чөж овны чөв и сывны. Водз асывнас пуяс дорысь өвтө сир дукөн.

Вөр ді горулын визувтө джодж пасьта шор. Ваыс югыд да чөскыд. Курыштан содзнад, китө көдзыдөн сотыштас. Юыс вель частө чукльөдлө мунан туйсө, вөчалө гырысь кытшъяс. Гашкө, мөвпалыштны көсийө: сулалө-ө визувтны водзө. Берег пөлөныс быдмөны съөд сэтөръяс, пелысь пуяс, чуткасьысь лежнөгъяс, уна сикас дзоридъяс. Кодкө быттьө найөс татчө нарошнө садитөма, медем лун и вой гажөдны мудзлытөм-узьлытөм шорсө. Воас татшөм местаас вотчысь либө вөралысь, и вель дыр кежлө ылалас вөр-ва мичлуннас.

Неуна бокинджык тыдалө зумыш да дзор парма. Пөрысь козьяс, өта-мөд бердас топөдчөмөн, сулалөны тани, гашкө, сө во. Вель унаысь найөс мыссьөдлісны тувсов да арся зэръяс, гожөмнас шонтывліс жар шонді, төвнас вевттьывліс пуяссө көч гөн кодь небыдик лым.

Вөр лэдзысьяс сэтчө вөчөмаөсь нин векныдик ордым. Сідзкө, регыд вөрсө керавны кутасны. Мем мыйлакө жаль сійө, пыр көсья аддзыны пармасө татшөмөн: ыджыдөн, озырөн, шаньөн.

Мед эськө некор эз ков гажтөмчыны сыысь, төдса вөр-васьыс.

Мед быд пөрийө верми сы ордө воыны шойччыны да вөрас пыригөн на ышловзьөмөн шуны:

— Чолөм, парма! Чолөм, дона ягъяс, муса расъяс, дзольгысь шоръяс!



ВОЙБЫД ЧУКСАСИС КӨЧ

Поводдяыс көдзыд на, а төд-чө нин тулыслөн матыстчөмыс.

Сійө локтө надзөникөн, пос-ныдик воськовьясөн, жөлөбьяс дорын ошалысь ёсь йи нёньяс-өн. Воас кад, и кутас поводдя-

ыс тэрмасьны. Таын отсалас сылы яр шондї, кодї лун-ысь лунө лоө посьджык, зільджык.

Вөрын лымйыс коскөдзыд лоө, лыжитөг да лямпа-төг некытчө он тувччы. Пуксяс вой, көдзыдыс зэлөдас ассьыс став вынъяссө, камгас-дорас вазьом лымсө, ён пос сы вылө вөчас. Не сөмын подөн, вөлөн позьё гө-нитны чарөм кузя.

Сэзьдас пйдөстөм енэжыс. Некөн абу кымөр чир. Сэки кодзувьяслы праздник. Войбыд югдөдасны узыысь пармаос, лым улө дзедьсөм юясөс, видзьясөс да рась-ясөс. Төлысь кө мыччас ассьыс көдзыд кымөссө — лунын кодь югид, прөшви кыны позьё. Войяснас пуяс-лөн бөждорьясыс сырзьөмаось, лапьяс вылас туктаяс ошйөмаось.

Оз куйлыссы татшөм войяснас көчлы. Мый көть и пасыс небыд да шоныд, көдзыдыс тай вөтлө. Да и югыд войяснад кокныдджык нурьясыны: он зурась, он крукась. Ёна корсьысыны оз ков,— пипуыд мындөм колө, туй вылысь позьё аддзыны и турун чирьяс, кодьясысь кузь төвнад ёна быри гаж.

Вөрса туйыс, кытчө талун көч петіс сёян корсьны, дзикөдз кушмөма. Төвбыд таті трактор кыскаліс вөр тыра додьяс, лымсө личкис ёсь пиньяса сьёкыд гусецианас. Көнсюрө муыс нин тыдалө.

Любө лои көчлы. Сідзкө, тулысыс ныр улын. Он и төдлы — исковтас лымйыс, вельмасны шорьяс, лун и вой кутасны сьывны, көчөс гажөдны. Сэсся өд позьё и паськөмтө вежны, а то ылөдз кутан тыдавыны еджыд пасьнад.

Кывзысьыштіс вөрса олысь. Гөгөр шы ни төв. Некутшөм зверь ни морт матігөгөрын абу. Повны некодысь, оз ков пышйыны лов тыртөдзыд. Дерт, көчильөйлөн пышъялөм да дзедьсясьөм кузяыд эм ыджыд опыт. Сідз кытшлалас вөрад, медся ён понсө быгйөдз посьодас, сэсся вөчас кымынкө кытш, звиркнитас-чеччыштас бокө и корсь сійөс, көсөйөс. Пель вылас кө он тальчы, бурөн оз чеччы. Да и сюсьлунсө ньөбны оз ков, уна зверөс путьмө пөръявлыны.

Кыскыштіс ичөтик нырнас көдзыд сынөдсө, кыліс тулыслысь көрсө. Көть и полысь, а ныриса, ветымын воськов сайысь кылас мыйөн өвтө. Ылөдз аддзөны и синьясыс. Көть и көсөйөн ыдждөдлөны, бокась и водзысь аддзө.

Көч сувтіс бөр кокьяс вылас, пельыс радысла лои ещө на кузьджык. Ичөтик сьөлөмыс тіпкө, төлысьыс шондйөн кажитчө. Сэсся удал зон моз зымнитіс кокнас, чеччыштліс вывлань и мөдіс йөктыны.

Көч йөктө, йөктө,
Еджыд табья кока...

Кор мудзис, сувтіс съодасьом туй шөрө, вомтырнас горөдіс: «Эй, чойяс, вокьяс, тулыс матыстчө!» Бытьё көсйис садьмөдны вөрса став олысьясөс — лым пиө репөм съола-тарьясөс, пу горсьясын узьлысь урьясөс да туланьясөс, байдөгөс и чукчиөс, ошкөс и ручөс. Көні коді эм.

— Чеччөй, тулыс, мися, матыстчө. Гажа тулыс! Тайө ме висьтала, медся төлка звер, көчильөй-чойильөй.

И бара мөдіс дөзмөдны шойччысь ягьяссө. «То-ло-ло... То-ло-ло... То-ло-ло...» Видзөдлас югьялысь кодзувьяс вылө, нерыштас ылысса төлысьсөс и чуксасыны кутас ещө на гораджыка.

«То-ло-ло... То-ло-ло...» Көчлөн гөлөсыс лөнь войө вель ылөдз кылө.

Ставныс, тыдалө, узьөны. Сөмын өтнас сійө горзіс-чуксасис гөлөс быртөдзыс. Төдөмысь, окотә өдйөджык юксьыны аслас радлунөн. Гашкө, думнас корис асьыс пөвсө, энь көчөс. Төдіс: воис свадьбуйтан кад.

И друг, көнкө зэв ылын, көчлөн сюсь пельясыс кылісны воча кыв. Сэссия чукөстчис мөд... коймөд...

Өні нин эз өтнас, а став матігөгөрсә көчьяс горзісны тулыс матыстчөм йылысь.

Көчильөй котыр уна вой на кутасны горзыны тайө гажа кад матыстчөм йывсьыс. Налысь радлунсө некод оз вермы мырддыны. Немтор он вөч. Гашкө, тулысыс буретш көч кок туйөдыс и локтө.





ТУВСОВЬЯ ПРАЗДНИК

Кыдзкө отчыл ме веськалі вөрса ичөтик посёлокө, коді пуксьома посёлокыс кодь жө ичөтик ю боко. Коркө тані овлөмаоьсь вөр лэдзысьяс. Кушиник мыльк вылын сулаліс барак сяма важиник вит-квайт керка. Олысьясыс тані өні лыда йөз. Медсясө пенсионерьяс, кодьяс дөзмөмаоьсь нин чиганьяс моз ветлыны местаыс местаө. Ныв-пияныс уналөн олісны да уджалісны орчча посёлокын. Воливлісны татчө сөмын шойччан луньясө, медым отсасыштны бать-мамлы. Корсюрө ещө узьмөдчывлісны вөралысьяс.

Кыйсян местаясыс тані и збыльысь лөсьыдөсь. Көть бур вөрсө во вит сайын на керавлөмаоьсь, но зверь-пөтка асланыс радейтанаинсө өнөдз абу эновтөмаоьсь.

Вөлі апрель пом. Муяс вылысь исковтөма нин став лымйыс. Лун и вой бузгисны скөр шорьяс, ыджыдджык юяслань вөтлісны асьыныс гудыр васө.

Посёлок дорө матыстчигөн на му вылысь аддзи руд көчөс. Сійө чеччаліс местаысь местаө да тэрыба акляліс чөскыд веж өзим. Сөмын сэки, кор ме шутөвті, көч

эновтіс веждөдөм му да котөртіс матыса кыздз раслань. Меным дыр на тыдаліс сылөн кузь пельыс, бөрсә кыз кокъясыс.

Өти кильчө пос вылын пукаліс ар нелямын вита мужичөй. Көть и рытыс вөлі шоныд, сійө мыйлакө шапкаа да дженьыдик съод пася. Здравойтчи, сэсса юалі:

— Ылын-ө нө тасянь выль посёлокөдзыс?

Мужичөй куньтыртліс ичөтик синъяссө, сэсса сы бөрын вөлисти вочавидзис:

— Кодлы өд кыздз. Тэныд кө, дерт, абу ылын: час-мөдөн воан, а меным ок, ылын.— Сэсса водзлань чургөдіс ассыис протеза коксө.— Берлинысь тайө «гөснечсө» вайи, война помасьтөдзыс кык час водздзык мина шаркнитіс.

Көть ме ёна тэрмаси, ковмис кольччыны татчө узыны. Кытчө нө вой улө петан? Көзяин, кодөс шуисны Семён Семёновичөн, рытивбыд меным мойдіс ассыис олөм-вылөмсө. Сійө вөлөмкө витөд во нин олө тані, төв и гожөм вөчалө леспромхозлы бөчкаяс. Гөтырыс мунөма ныв ордас кага видзны, и өні сійө өтнас.

Ичөтик комнатаын вөлі сэтшөм жар, мый водөм водзвылын ме петі кильчө вылө ыркөдчыны. Протеза коксө съөкыда кыскигырйи сэтчө локтіс и Семён Семёнович.

— Гашкө, Силантий ордө телевизорасыны петалам,— шыасис сійө ме дінө.— Быд рыт ми сэні матө войшөрөдз кургам. Дивъя өні, спектактө и кинотө гортад позьө видзөдны. Көть и вөрын олам, а төдам көні мый вөчсьө.

Көзяин, тыдалө, мыйкө ещө на көсйис висьтавны, но эз удит. Дзик керка весьтөдыс лэбзисны горда пара. Найө лэччисны пыр увлань и увлань, сэсса пуксисны матыса ичөтик гөптө.

— Тіян тані заповедникын моз жө, көчыд өшинь улөдзид локтө, уткаясид керкаяс вывтійд лэбалөны.

Семён Семёнович малыштіс летөрөс кодь шочиник юрсисө, пуксис мекөд орччөн.

— Зверь-пёткаыд абу йойёсь, төдөны, мый тані некод найөс оз вөрөд, вот и збойёсь. Некодлөн керка помас пон ни пищаль абу. Зато быд олысьлөн көза да кань. А найө, ачыд төдан, омөлик вөралысьяс. Нянь куд дорын сөмын кыйөдчөны. Ме и ачым вөравныд радейтлі да өні некыдз, кок пөвнад көч-ручтө он сүөд. Кызь во нин пищальсө киө эг босьтлы.

Көнкө неылын кыліс истан гөлөс: «Лок татчө, лок татчө». Недыр мысти шыасис сійө, кодөс чуксалис. «Коді сэн, коді сэн?»— вочавидзис ай истан да вөсньыдик кокъяснас котөртіс пөдруга дінас.

Телевизор видзөдны көзяин сідзи и эз мун. Варовитім татчөс олөм йывсьыс вель на дыр. Лөнь рытыслысь чөвлунсө унаысь на торклісны шөвк морөса гордаяс, вайвывланы лэбзысь гырысь и посни лэбачьяс.

— Тулыснад гажтөм тані оз босьт. Быдсикас сьылөм-чуксасьөмсө кывлан,— любуйтчис протеза морт.— Ме со витөд асыв нин шондісьыс водз чечча. Төдан он мыйла?

— Висьтав.

— Таръяслысь койтөмсө кывза. Пукся кильчө вылө и мукөд дырйи час-мөд ола.

Менам весиг серамөй петіс. Висьталысьыс көнкө думайтө — бокөвөй мортлы позьө быдторсө изны, веритас, вомсө паськөдөмөн кывзас.

— Гашкө, узыны пырам?

— Сідзи и төді, он кут эскыны. Со аддзан эсійө кук йөрсө, гожөмнас сәні көзаяс видзам,— кызд расланы кисө чургөдліс көзяин.

— Аддза, йөр кызд йөр. Мый сәні, кутшөм дивө вермас лоны?— веськодьпырысь юалі ме.

— Аски нарошнө водз чуксала. Аслад пельясөн ставсө кылан.

Семён Семёнович эз пөръяв. Чуксалис менө водз асывнас, кызди и косьис. Коть кузь туй подон восьла-лом борын окота на вөлі куйлыштны небыд вольпась вылын, лои чеччыны, абу од гортад.

Козьяин улыс дөрөм вылас плавнитіс пасьсө, кокас сюйс домаса ыджыд гынкөм, шапкаасис, сэссия отнас петіс ывлао. Эг на удит кокъясөс лэдзны крөвать вы-лысь, кызди сійө бөр пырис. Ачыс шешъяло, синъясас сы мында радлун.

— Ссылөны, моръясыд. Пола вөлі, төлакодь асы-лыс да оз, мися, чукөртчыны. Петалам, кывзыштам.

Ковмис пасьтасыны, петны козяин бөрся. Шоныд керка борын асья ывлаыс ыркыд и төла. Пуксис кильчо пос выло и пыр жө кук йөр дінсянь кылісны койтысь таръяслон уна лыда гөлөсьяс.

«Ур-уру... чуфыш... чуфыш...»

Татшөм матын койтоны! Кызди нө та борын вөра-лысьяслон оз дрөгнит сьөлөмыс? Коть кодзыдыс пись-кодчис морөс пытшкө, а ми пукалим да кывзим. Челядь моз долыда ворсөдчысь синъясыс вөрса мортлөн быт-тьө косьисысны тшөтш котөртны паськыд йөрас, көні өні ворсісны да пасйисны ассъыныс тувсовъя праздник-нысө дасысь унджык тар.

Чай юигон Семён Семёнович висьталис меным тайө койт лоом йывсьыс. Сійө заводитчылөма уна вояс сайын на, кор тані олысьясыс на весиг абу вөлөмаось. Лесопункт восьтөм борын вөрса петукъяслы ковмөма эновтны ассъыныс гажөдчан места да вуджны паськыд нюр выло, коді тасянь абу ылын.


Кык во сайын лесопунктса рабочөйяс вуджисны овны выль посөлокө. Эз кут кывны тракторъяслон мургөм шыыс. Коть вөрса посөлокын важ моз сулалісны керка-яс, но таръясөс бөр кыскис төдса местаясыс, кос дзиб-йыс, коді тулыснас медся водз шыбитө ас вивсьыс еджыд эшкынсө. И таръяс эновтісны вутшкось нюр, көні

котравны ни ворсны прамёя он вермы. Бөр кутісны
койтны важ местаас.

Кор-ме прөщайтчи няня-сола көзяинкөд да мөдөдчи
виль лесопунктө, кежавлі тайө йөр дорас. Таръяс көть
сэні эз нин вөвны, но пельын пыр на кыліс койтөм-га-
жөдчөмыс. Ыджыд жө выныс, тыдалө, тулысылөн.
Ставсө садьмөдө, ставыслы козыналө праздник.



25481





КОТЬ И ИЧОТИК, А ЗВЕРЬ

Вөрса туйод, кодос гөгөрбок кытшалёмаось тусяпуяс, вösньы-дик бадьяс, вösлалис геолог. Мышкас вушйыштөм, ыджыд рюкзак. Сэни быд сикас изьяс, кодьяс кош тыр пösь нин вötлис-ны геолог чужöмысь. Мунысь морт коть зэв на том, но кузь туйыс да сьökыд грузыс и сийös мудзтöдис. А вösлавны, көни уджалисны да олисны сылөн ёртыясыс, ковмас вель на дыр.

Дженьыдöсь да скөрösь арся луньясыд войвылын. То кодзыд зэр дözмöдчыштас, то петалас сэтшöм төв, мый, вермас кө, уськөдас кок йывсьыд, кульыштас юрсьыд шапкатö. А талун ни зэр, ни төв. И ывлаыс абу мукöд луньяс кодь кодзыд.

Помасис васöд места. Геолог öни вösлалис неыджыд кыр паныд, көни вöрыс вöли вывти гежöд. Танi тыдалисны сöмын пожöмьяс — войвывса вөр-васö гажöдысь пуяс. Геологлы дум вылас уси Алфимовлөн висьт, кодос сийö неважөн лыддис «Смена» журналысь.

«Ми — пожомъяс. Ми — ылөдз юргысь ыргөн стру-
ная, кодъяссө нюжөдөма му да небеса костын. Кор
миансө кышөдө төв, ми сылам еджыд кымөръяс йы-
лысь, кодъяс шывгөны мян весьтөд, и му пытшса кө-
дзыдъяс йывсьыс сылам, кытчө дзевсисны мян вужъ-
яс. Ми му пытшкынөсь и енэжас. Ми көрталам лунсө и
войсө, пемыдсө и югыдсө. Ми өд — пожомъяс...»

«Лөсьыда шуөма», — ышловзис геолог и друг падмис.
Сысянь воськов вит сайын, пөрөм пожөм улысь,
мыччысис ичөтик зверь. «Визяорда», — вашнитіс аслыс
том морт.

Визяорда казяліс мортөс да дзевсьөм пыдди кутіс
видзөдны геолог вылө. Ачыс ичөтик-ичөтик, туша кузя-
ыс мунө чукуль-мукульөсь вит визь. Бөжыс вөсньыдик,
тушасьыс на дженьыд. Кутан кө сійөс, төрас ки пыдөс
вылад, сэтшөм сійө жебиник.

Геологлөн мудз чужөм вылас мыччысис нюм. Мурт-
са вештыштіс няйтөсь сапөгсө водзлань — визяорда
тэрыба чипөстіс и пуля моз воши вужля улө.

Геолог кө эськө кутіс лыддыны кызьөдз, эз удит.
Вужля мөдар боксянь бара мыччысис дзевсясянторйыс.
Первой тыдовтчисны сылөн пельясыс, сэсся воөм льөм
тусь кодь синьясыс. Гашкө, визяордалы окота вөлі ви-
дзөдлыны татчөс местаө воөм морт вылө.

Геолог эз на удит вөчны и өти воськов — визяорда
бара тюркнитіс-воши.

Том морт шыбитіс мышсьыс изъяс тыра рюкзаксө,
сьөкыд тушасө лэдзис сы вылө. Ачыс синьяссө оз веш-
тыв пөрөм пу дорысь. Вөрса олысьөс виччысьны ков-
мис регыд, сійө выльысь мыччис ичөтик чужөмсө, дже-
ньыдик кокъяссө, быттьө көсйис ошйысьны: «Со ме
кутшөм, любуйтчы мындөм колө, а кутны эн и думайт —
он су, өти здукөн пышъя».

Сідзи и эм. Муртса геолог шутөвтис, визяорда быттьө
сійөс и виччысис. Чургөдіс бөжсө, чеччыштліс водзлань,

сэсса өдйө пышйис тілля пуяс пытшкө. Дарөм медся ичөт зверь, а вөлөмкө, тэрыб и сюсь. Ичөтиктө да омөликтө быдөн вермас өтдортны. Дзедсян кө ас кадө, бурджык лоө.

— Ак, зимөгөр, пышйин. Часлы, видзөдла, мый вөчин вужля улас. Менө он пөръяв,— том морт мала-лыштис кадысь водз лэдзөм тошсө, сэсса матыстчис пу дорө, кытысь сөмын на пышйис дженьыд кок.

Вужля улын тыдаліс кык ыджыд розь. Шуйгаладорас — сөян видзан кум. Мыйсө сөмын сэтчө абу кыска-лөма: пуяслысь да турунъяслысь көйдысьяссө, весиг ид да зөр тусьяс! И ставсө тэчөма торйөн. Гашкө, шапка-тыр запас төв кежлө чукөртөма. Мөд розяс визяорда-лөн узыланіныс. Сэні, тыдалө, кос турун да быд сикас пу корьяс. Узыныс небыдджык, шоныдджык лоө. Мыйөн көдздөдас ывлаыс да кынмас муыс, сійө дыр кежлө мушкыяс-водас шойччыны. И сөмын водз тулыснас, кор нин шондіыс кутас прамөя пөжны, первойысь петас позсыс.

Заводитіс нин рөмдыны, а геолог пыр на бергаліс пөрөм пу дорын, гашкө, думнас выльысь көсйис аддзывны ичөтик удал зверөс. Колөкө, и том мортлы-окота вөлі кольны татчө ассыс лунся став мудзсө.





РАНИТЧӨМ БАЙДӨГ

Вөралысьлөн керкао, кодi сулалiс мир туйсянь ёна бокин, овмөдчисны нельён — Шорйив лесопунктса рабочойяс. Асывсянь рытөдз найо вундалiсны выль дялянкаяс, медым туй пуксьом бөрын танi заводитны вөр лэдзан уджъяс. Көть и уджалiсны дас лунысь дырджык, а вöчны колö вöли зэв на уна.

Падмөдiсны найос медсясö зэра лунъяс, кодъясөн озыр войвывным октябрын. Уджыс содiс надзөн, а пельпомъяс вылын вайом сьокыд мешökъяс тыртөм-мисны өдйö. Талун асыв найо медбөръяысь пуисны картупель, куйм пельö юкисны нянь тупөсь джын, кодi из кодь нин чорыд, юисны завариттөм пузьөдтөм ва, но удж вылö петiсны. Сöмын эз нельён, а куимөн. Нельөдсö кык лун сайын на мөдөдiсны лесопунктö вайны мый-сюрö сёянтор.

Көть и мукөд лунъяс моз талун эз зэр, рабочойяс лун шөр бөрын и бергөдчисны вөр керкао. Тшыг кынөмнад некодлы эз вöv окота уджавны. «Кызкө-мыйкө аскиөдз терпитама, сэн жö гоз-мөд сукартор на коли», — думайтiсны найо.

Сергей куим пельö юкис мешöк пыдöсö кольöм сукарторъяс, крöшкияссö весиг быдöнлы пунктис öтмында.

— И мыйла ме йöйталі, пищальöс эг босьт,— медводз шыасис том морт Коля Петрунёв.— Кыскалöмысь повзи. Кутшöма эськö öні згöдитчис. Сьöлаöс либö тарöс позис лыйны.

Коймöд мортыс, сьöд юрсиа, ичöt тушаа Федя, коді пырджык чöв оліс, ыджыда ышловзис:

— Тöдны эськö, дыр-ö позьö овны тшыгйөн?

— А тэ видлы, сэки и кутан тöдны,— ва ырскигмөз вочавидзис Сергей.

— Бурджык эськö, мöдтор йылысь кö сёрнитід.

Сэсся öта-мöд вежмөн заводитісны видны ассьыныс ёртсö, коді муніс лесопунктö, и эз во ас кадö.

— Но и но, ме сідзи и тöді, ылалас мися Ёгорей-Гогорейыд,— шуасис Коля Петрунёв.

— Сылөн öд кынöмыс оз сюмав, мушвидзö көнкö небыд вольпась вылын,— дорйыштіс том мортöс Сергей.— Колöкö, аски на оз лок.

— Воас,— вомгорулас нурбыльтіс Федя.

Кутшöм гажä овывліс вөр керкаын воддза лунъясас. Локтасны вöлі удж вылысь, косьтасны кöтасьöм паськөмсö, ужнайтасны топыда, юасны юмов чай, сэсся вой шөрöдз гөлчитасны, теш да серам вöчасны. А талун ставныс чöв олöны, зумышöсь, скөрöсь. Сёрнитныныс весиг дыш.

Вöлі дзик на югыд, а Сергей нюжöдчис нин нар вылö, сэсся малыштіс кынöмсö да весиг нюмъөвтис.

— Любита чöскыда сёйны да дыр узьны. Водалöй, гашкö, нянь тупöсь вötөн аддзылад. Эк, пöсь шыд эськö öні паньыштны!

Водіс и чöв олысь Федя. Кияссö пунктис юр улас, некодарö кыв ни джын оз шу.

Дзескыд пач пытшкын пыр на трачкакыліс сирөд пес.
Сьөд стенъяса вөралан керкаын лои жар.
— Федь, а Федь, көсьян кывзыны мойд?
И Сергей заводитіс лыддыны:

Бобө, бобө, кытчө ветлін?
Чожө дорө ветлі.
Мый нө сэтысь вайин?
Выя нянь вайи.

Бобө, бобө, кытчө ветлін?
Чожө дорө ветлі.
Мый нө сэтысь вайин?
Выя нянь вайи.

— Гын нөш тэ, Сергей. Отиторсө долян,— вомаліс сійөс Коля Петрунёв.— А кызди нө терпитісны найө, кодьяслы война дырйи ковмис пыкны Ленинградскөй блокада! Батьө менам сэні вөлі.

— О... Тэ тай и велөдны кужан. Оз ков, Колюк. Менам ус нин петө. Регыд ачым батьөн лоа. Төрыт колі ставнымлы лэччыны гортө. Уджыд некытчө оз пышйы.

— Мөдіс дзуртны,— дөзмис Федя.

Петрунёв пасьталіс ватник, босьтіс сьөдасьөм ыджыд пөрт да лөсьөдчис петны. Тайөс казяліс Сергей и кыпөдчыштіс нар вылысь.

— Тэ нө кытчө? Али секрет? Вошан да өд, и корсьныс ог путьмөй.

— Эн пов, ог вош. Ветла нюр вылө, турипув чукөртышта.

— Вот тайө төлкатор. Ветлы, ветлы, и мянөс эн вунөд, вомкөтшад көть тшөтш вайышт гоз-мөд тусь.

Нюрөдз вөлі матын. Коля восьлаліс тэрыба, медым пемдытөдзыс бөр бергөдчыны вөр керкаө. Нырас өвтис васөд сынөдыс.

Матё километр кузъта нюжодчёма тайё нюрыс. Шочиник да вёсни кока пожомъясысь ёддор тані нинём эз быдмы. Зато турипувйыс сярвидзё, коктё пуктыны некытчё. Мукёд вутш бердас ёшалё — ётилавьсь содзтыр позьё чукёртны.

Коля зіля ёктіс пёльтчём вотёсьяссё — кодёс вомас, кодёс пёртйё. И буретш сэки пушкыра вутш боковыс чепёсийс руд байдёг да лэбзьём пыдди заводитіс котёртны нюр кузя. Коля сы бёрся. Байдёг чеччыштліс вывлань, но бёр уси, лэбзьыны эз вермы.

Том морт крукасьліс вутшъясё, но пёткавыс эз кольчы, вот-вот суёдас сійёс.

Пёсвятёдзыс вётлысис, а век жё кутіс. Байдёглён тэрыба тіпкис сёлёмыс. Ёні сёмын Коля казяліс: пёткалён шуйга борд вечикыс чегёма. Та вёсна, колёкё, и омёлътчёма, лыясыс ки улад чурвидзёны. Пуксьёдіс сійёс Коля пёртъяс, вевттьыштіс шапканас, сэсся бёр модёдчис ёртъяс дінас. Кутшём нин турипув вотём, кор пётка шеді. «Ок и радуйтчас жё Сергей. Яя шыдён позьё нуръясьыштны», — шпынняяліс Коля.

Вёр керкаё здукён и воис. Ёдзёссё восьтігмоз на горёдіс:

— Чеччалёй, шонді банъяс, видзёдлёй, мый ме вайи. Дуль ваыд кутас петны, — сэсся пуктіс пёртсё джек пом вылё, лэптыштіс шапкасё. — Вот и воим гортё, шонтысь. Но-но, эн пессы. — И Коля заводитіс небыдика малавны кутанторсё.

Сергей да Федя гёгөрвотёма видзёдісны то байдёг вылё, то зон вылё.

— Ой, Колька, чёрт пи. Кытысь нё тэныд татшём шудыс уси, — визув пон моз чеччаліс Сергей. — Ёні жё выльысь пач ломта. Сэтшём шыд пуам, кывъяснытё нылыштад.

Сэсся пыр и уськёдчис пач дорё, заводитіс пёлявны ёгыръяссё, кодъяс абу на удитёмаёсь кусны.

— Федя юасис другыслысь, кызди сылы удайтчис кутны ловья пөткаос.

— Ранитчөма сійө. Борд вечикыс жугалөма.— Коля босьтис байдөгөс киас да надзөникөн топөдис морөс бердас.

Сергейлы тайө сёрниясыс вөліны дзик веськодьөн. Став думьясыс сылөн көртасьөмаось пач гөгөр, медым өдйөджык ломзьөдны сійөс да пузьөдны ва. Синва петөдзыс нин пөлясис, а пескыс некыз оз көсйи өзйыны.

— Вөрад олігөн быдторсө аддзылан,— нар помө пуксис Федя.

— Петрунөв, песовт өдйөджык юрсө, байдөгсө куштыны колө,— тэрмөдліс Сергей.

— Этійөс эн аддзыв!— певсө мыччыліс Коля, сэсса перйис аптечкакысь йод бутылка, кисьтыштис бинт вылө и заводитис надзөникөн мавтны байдөглысь доймөм местасө.

Сергей кокъяссө паськөдөмөн сулаліс пач дорын, синьясыс букыштчөмаось.

Йодыс, тыдалө, кутис сотны, байдөг дугдывтөг нетшкысис-пессис. Зон пөляліс дой вылас да өтторья кайтис:

— Терпитышт, терпитышт, донаөй. Тэныд өд бур көсья вөчны. Эн пов, ог дойд.— Сэсса байдөгсө пуктис шапка пытшкас, нуис вөрө. Пуктис сійөс сук лапьясаниа пу улө, пөтка ныр улө кисьтис зепсьыс нюр вылысь чукөртлөм став турипувсө. Байдөг куткыртчис пу бокө да аслысног меліа видзөдліс ылыстчысь зон вылө.

Кор локтис Коля бөр, Сергей пырөмөн тшөтш уськөдчис сы вылө:

— Талунсянь тэ мем абу друг. Сёрнитны весиг ог көсйи.

— Со кызд, аппетиттө торки да сійөн али мый?

— Тэныд эськө доктор Айболитөн лоны,— не то ошкыштис, а гашкө, кулитыштис Коляөс чөв олысь Федя.

— Колö жö татшöм йöйöн лоны. Ачыд эн сёй да и миянлы эн сет. Көнкө, синваыд петіс жалыыдла. Эк тэ, йöй нисьö прöсуж.

Коля Петрунёв пыдди вочавидзис Федя:

— Лыдды, мый тэ эн и аддзыв байдөгсö. Кажитчис сійö тэныд — и ставыс. Асывсянь сёйтöгыд не татшöм-торъяс на вермасны дум вылад усыны. А Колька молодеч. Бур сылөн сьөлöмыс. Радейта татшöм йöзсö. Радейта — и пом!





ВОТ ТАЙЎ ВӖРАЛЫСЬ

Кодсюрӧ думайтӧны, мый вӖралӧмыд сӧмын шлӧнъялӧм. Босьтӧн пицаль, пуктӧн зептад кымынкӧ патрон, ӧшӧдӧн мышкад ноп — сӧсся и ягӧ. Лунтырнад кодкӧ век нин сюрас: либӧ сьӧла, либӧ кӧч.

Шуан кӧ тадзи прамӧй вӖралысьлы, сийӧ эськӧ тӧнӧ серамвыв лӧптас. ВӖралӧм — сьӧкыд да ӧпаснӧй удж. И сӧмын сийӧ, кодлӧн эм колана вын, сюсь синъяс, кодъяс бура тӧдӧны зверь-пӧткалысь оласногсӧ, вӖр керкаӧ локтӧны пырджык озыр прӧмысӧн. Дерт, колӧ и тӧлка пон. Нӧль кока другыд вӖралысь мортлы пыр вӧли бур отсасьысьӧн. Понтӧг вӖралӧмыд тӧлын кӧмтӧг ветлӧм кодъ жӧ. Коктӧ мудзтан, а тӧлкыс пу грӧш дон.

Конструктор некор эськӧ эз вермы вӧчны мыйкӧ выльтор, оз кӧ зэвт став тӧдӧмлунъяссӧ, вынъяссӧ. Велӧдчысь, кодӧ кӧсийӧ тӧдны мукӧдъяс серти унджык, ӧнджыка зунясьӧ книгаяс сайын. ВӖралысьлы сюсьлунтӧг

да зільлунтөг бурджык не воштыны кадсө. Оз прөста шуны: «Вын пуктытөг и прудыйсь чериос он кый». А зверь-пөткайд чери дорсьид сюсьджык на.

Ме тогда өти вөралысьос. Пыр нимкодяся сы удалунөн. Егорөн сійос шуоны. Гожомнас кызь арөса том морт уджалө запанын, вөр пурьялө. Төвнас электропилаөн пөрөдчө. Арнас, кор дугдасны пурьясьны запанын, Егорос аслас Буско понйыскөд позьө аддзыны сөмын парамаысь. Быд во отпусксө коллялө ылі вөрьясын, шоча и воylvлө гортас.

— Висьма ме, дырджык кө вөрас ог воны,— норасис сійө кызкө меным.

Шуйга певьяс вөралысьлөн эм пас: туланлөн лэчид пинь туйыс. Көть сэсянь коли нин некымын во, а том морт өнөдз помнитө тайос.

Сэки Егор сөмын на велөдчис вөравны. Ёртыс, кодкөд узьмөдчисны нодья дорө, мешөксьыс перйис рудов тшын рөма кыз бөжа туланос да заводитис ошйысьны:

— Со кызди колө вөравны, Егорушко.

Том вөралысьлы лои яндзим: сійө лунтырөн лыйис сөмын вит урөс. Син водзас дыр на тыдаліс сьөд кокъяса, ичөтик пельяса зверь, кодлөн голя улас да морос водзас гөныс югыдджык, бытьө мөд зверлысь кусө сэтчө вурыштөмаось.

Мөд луннас югдытөдзыс на Егор понйыскөд энөвтис шоныд бипур. Чай весиг эз ю. Вывті нин дөзмис ас вылас. Некидз оз вермы вунөдны небыд гөна туланос. Окота тшөтш кыйны тайө мудер да мича зверсө, коді медсясө шөйтө-кыйсьө войясын, узигкостыс пу горсьясысь джагөдалө урьясөс, куталө лым пиын шойччысь пөткаясөс. Да и куыссылөн зэв дона. Оз быд вөралысьлы усьлы шуд кыйны-пөрьявны сійос. Аддзылан кө, кызди тулан чеччалө пуысь пуө—некор он вунөд. Бытьө оз зверь, а кутшөмкө биа ньөв тьюө пушкыра

пуяс вывті. Мудзтас понтö и асьтö. Вöтчан сы бöрся,— дөрöмтö ковмас пыдзравны.

Буско гоз-мөд пуысь нин увтіс урöс, а Егор быттö оз и кыв. Мунö водзö Дурака шорлань, кытысь тöрыт аддзыліс туланлысь кок туйсö. Көть öд том, а кужö нин лыддыны вöрса шыпастö.

Буско көзяинсö вöтöдіс дыр мысти нин. Дöзмöма, кужис кө, гашкö, көрityштис Егорöс. «Старайтча, старайтча, гөлöс быртöдз увтча, а тэ он и кежавлы пу дорас. Тадзнад и ме лөгасыны верма».

Сэсся Буско лэдзис сьöд нырсö кын му вылö, вель дыр исасис и öдйö котöртіс коз пу дорö, коді матігö-гöрын вöлі медся джуджыд, медся кыз. Пон заводитіс гораа увтчыны. Урöс сійö тадзи некор оз шыавлы.

Эз на удит лэдзны пищальсö пельпом вывсьыс, кызди пу вылысь торйöдчис кодкö и чеччыштис орччөн сулалысь кыз вомөн. «Тулан»,— сöмын удитіс думыштны зон, но зверь дзик пыр и воши. Буско — сы бöрся. Егор көть ылö коли, а котöртö, чеччалö посныдик понöльяс вомөн, немтор оз мешайт сы кокъяслы.

Гашкö, быдса километр котöртіс, сэсся жаяліс-мудзис, пöрччис шапкасö, ниртыштис сійөн чужöмсьыс пöсьсö. А понлөн гөлöсыс ылыстчö и ылыстчö. «Ковмас эновтны?» Но дум вылас уси ёртыслөн тöрытья туланыс, и кокъясыс бара кутісны нуны водзö, муртса кылысь пон гөлöслань, коді то вошлö, то кывлö выльысь.

Лун шөр бöрын сöмын аддзис понсö. Сійö бергаліс увъястөм кос пу гөгөр да корис ас дінас көзяинöс. Тыдалö, дженьыд кокъяса тулан мудзöма чеччавны пуысь пуö, пырöма шойччыны тöщö пу пытшкö, кытысь некод сійöс оз аддзы. Сідзи и эм. Пуас тыдалö вель ыджыд розь. Төдöмысь, зверь сэні.

Егор корсис вöсныдик кос зіб. Гартліс сэтчö көтасьöм шарпсö, сэсся тупкис сійөн розьсö. Öні туланлы пышйыны лöö некыті. Пöрöдіс чер отсöгөн пусö. Тулан

вөлі сэні, вөралысьлы весиг кыліс пытшкын зверлөн вөрөшитчөмыс. И понйыс сылысь дуксө кылө, никсө, чапалө кондасө. Зон надзөникөн перйис розьсьыс шарпсө и өдйө сюйис сэтчө кисө, көсийис кыскыны туланөс. Он тай босьт! Мыйкө друг сотыштис кисө, доймөмысла Егор горөдіс быдсөн. Өдйө кыскис кисө. Певсьыс тюрөбөн визувтис вир.

— Босьт, Буско, босьт! Кут!

Понйыс вайөдіс нырсө розь дорас и бара жө ойөстис: тулан гыжйыштөма сылысь чужөмсө.

Немтор эз удит вөчны вөралысь, зверыс пуляөн чепөсийис йөршитлөминысь, сяркнитис-кайис пу йылө, сэсся бара заводитис пышйыны, пуысь пуө чеччалігыр.

Егор тэрмасьөмөн көрталіс певсө и важсьыс на өдйөджык заводитис котөртны пон увтчөм шыө.

Кутис нин пемдыны, а вөралысь век на вөтчис тулан бөрся. Аддзис понсө. Сійө пукаліс чукля пожөм бокрын да скөра увтчис. Бара, тыдалө, жаявтөдзыс мудзтөма туланөс. Лыйны эз нин тыдав. Бергөдчан кө вөр керкаө, мудер зверь войнас, дерт, пышъяс. Став уджыд вошө.

Лыс лапъяс вылө пуксисны Бускокөд орччөн. Биасьны оз позь. Кылас нырися зверь тшын дуктө — и корсь сійөс! Көтасьөм паськөмөн абу кокни коллявны вой, Егорлөн кынмөмысла таркакылісны пиньясыс. Төрөщитис певйыс, но сійө быттө немтор эз кыв.

Югдөм бөрас Егор вөтліс тулансө щоньд позсьыс. Эз удит зверьд чеччыштны пу вылысь, кыдзи вугралысь ягсө садьмөдіс ружьеысь шковгөм. Пушкыр бөжа тулан уси кын му вылө.

Радысла Егорлөн муртса синваыс эз пет.





СЫЛӢЙ, ЛЭБАЧЬЯС, СЫЛӢЙ...

ПарчӢг сикт весьтын, ЭжвалӢн мӢдар берегас, эм кык ичӢтик ю: Тэг да ТыбӢд. НайӢс позьӢ шуны чӢя-вокаӢн. Юяс то дзевсьыласны вӢрса веретяяс костӢ, то визувтыштасны видзьяс дортӢ, сэссия, тыдалӢ, дӢзмасны дурны-ворсны — ӢтлаасьӢны важ ЭжвакӢд, медым ассьыныс сӢстӢм васӢ нуны водзӢ, ыджыд ЭжваӢдз, а сэссия мореӢдз, океанӢдз.

Дыр налы ковмас визувтны важ Эжва кузя. Нимко-дяссьыштасны Норта-вожса гажа дзибьясӢн. Берегыс танӢ джуджыд, ягыс кос да лӢсьыд. ВылӢдз лӢптӢмаӢсь юрнысӢ кыз нывьяс, пӢрысь пожӢмьяс.

Важ ЭжвалӢн шуйга берег пӢлӢныс нюжӢдчӢмаӢсь видзьяс. ГожӢмнас сэтчӢ кыптасны гырысь зорӢдьяс, лун и вой кутасны сяргыны ытшкан машинаяс.

Тэг да ТыбӢд пӢлӢн дзевсялӢмаӢсь гырысь и посни тыяс, кадья вадьяс. РадейтӢны татчӢс местаяссӢ быд сикас уткаяс. Быд гожӢм сӢнӢ быдтысьӢны гордаяс, жы-дачьяс, косысьяс, кӢрӢгьяс.

ГожӢмнас, мыйӢн жар шондӢ ярмас, чӢя-вока век-нямӢны. НайӢс Ӣтар-мӢдар боксяныс топӢдӢны

тшемён сулалысь төричъяс, кодъяс ставсö саймовтасны-дзедасны. Лунтыр коть сэні пукаласны уткаяс, он и казав.

Август шöрын, кор том уткаяслөн вынсяласны бордъясыс, рытьяснас заводитасны лэбавны ыліджык тыяс вылö. Войбыд нуръяясны, сэсся лун кежлас бөр дзедсялöны турунъяс пöвстö.

Водз асылын лöсьыд кывтны-катны пыжён Тыбöд кузя. Васа кузъяс кучкалöны пыж пыдöсад, варовитöны пыжын пукалыськөд, кузь төричаяс гартчöны пелыс гөгöрыд, быттö көсийöны сувтöдны пыжтö.

Джуджыд кызды вылын, кодi сулалö берег дорын, чуксасьö нин водз садьмысь көк: «кук-ку... кук-ку...» Тайö медбөръя көкөмъяс, регыд сэсся позтöм көклысь он кут кивны гөлөссö. Оз прöста шуны: «Нянь воис — көк виньдiс йикиён».

Ю пöлөн качайтчö кокныдик ру, оз тöд кытчö воштысьны, корсюрö дзикöдз тупкылас лысваён көтасьöм турунъясöс, дзоридзьясöс.

— Тельс, тельс, тельс,— асья чöвлунсö торкö тэрыба ворсöдчысь кык лопта пелыс. Көнкö зэв матысь кыпöдчисны госа гордаяс да ва веркөсöдыс лэбзисны лөнджык местаö.

Пыжлысь матыстчөмсö ылысянь кылöны и турунъяс пöвстö дзедсьöм черияс, тювкнитасны тэрыба — корсь найöс. Видз гриваяс да посныдик дiяс вылын сьылöны лэбачьяс, гажөдöны матигөгöрса вөр-васö, исергаясөн вöччөм кызьясöс, льöм пуöс и пелысьöс.

Пыж нырад коть куйлö пищаль, вунöдан сы йылысь. Мича серпасьясыс, асья чöвлуныс, лэбачьяслөн гажөдчөмыс, черияслөн гыбалöмыс — ставыс тшöктö нимкодясьны пыжын пукалысьясöс. Татшöм асивьясыс öд олöмад оз быдлун паныдасьлыны.

Коть водз чеччи, а кодкö со пановтöма. Ме кодъ жö пыж сулалö кык ты костын, Тыбöд ю бокин. Пыж нырас

да бѡжас сувтѡдѡма бадь кустьяс, ылысянь он и казяв сійѡс.

Матыстчи. Пыжысь чеччис ыджыд тушаа, ён морт. Вомас папирос, киас ружье. Кузь гѡленя сапѡга, ватника.

— Бур асылѡн, друг!— ылысянь на горѡдіс сійѡ.

Тайѡ жѡ Вась, менам велѡдчан другѡй! Пыжсяньыс неылѡ, гѡгрѡсіник тыѡ, лѡдзѡма жыдач чучелаяс. Виччысьѡ гѡстьясѡс.

Кык ветки ѡтлаасисны. Пансис варов сѣрни.

— Лѡсьыда дзевсьѡмыд. Уткаясид, кѡнкѡ, ныр улад и пуксьѡны,— шмониті ме.

— Ѳтчыд на эг лый. Казялѡны, буракѡ, сюсь синьясыд,— гиргис-сераліс Василий.— Уткаясидлы ѡд выв-сяньыд лѣтчикьяслы моз тыдалѡ ылѡдз.

Вѡвлѡм танкист Платонович, вѡлѡмкѡ, тѡрытсьянь нин тані. Кѡччѡйягсянь пыжѡн локтѡма. Лун-кык кѡсйѡ овны. И кытчѡ тѣрмасьны, кор мортыс петѡма отпускѡ? Карсьыд ѡд удитан на нылавны буссѡ.

Платонович быд во асьыс отпусксѡ коллялѡ вѡрваын. Сійѡс позьѡ аддъыны и сѣтѡр кѡрзинаѡн, и пув тыра пестерѡн, да и сьѡла-тартѡг шоча воывлѡ гортас.

Быд пѡрйѡ, кор ме вѡралігѡн паныдася тайѡ тѣрыба сѣрнитысь мортыскѡд, дум вылѡ усьлѡ шуштѡм серпас, кодѡс сьѡлѡм бердын вѡдита уна вояс.

...Вѡлі Май первой лун. Праздник кежлѡ ме карысь локтї чужан сиктѡ. Окота вѡлі шѡйччыштны, аддзѡдчывны другьяскѡд, сѣйыштны мамѡлысь чѡскыд шаньга-сѡчѡн, а сѣсся бѡр мунны карѡ велѡдчыны.

Рытнас важиник клубын видзѡдім кино. Сѣні вѡліны и менам другьяс, кодьяскѡд шоча торйѡдчывлім. Экран вылын тышкасисны белѡйяс да краснѡйяс. Быд пѡрйѡ, кор белѡй офицер усьлі вѡв вывсьыс, ми, челядь чукѡр, горзім-шутьялім, быттьѡ асьным тшѡтш нѡйтїм вѡрѡгѡс.

Кино йылысь сѣрни муніс водзѡ мѡд луннас, вичко

весьтса лудъяс вылын, кытчö ми лэччим купайтчыны да лыйсьыны.

Кöть мянлы муртса на вöлі дас кык — дас куим арöсөн, детинкаяс пивсь быдöнлөн вöліны пищальяс. Батъяс гуляйтöны, а ми лöсьöдчим найö ружьеясысь лыйсьыны пасъясö.

Луныс вöлі шонид. Видз нöрыс вылö вöчим ыджыд бипур, а асьным заводитім купайтчыны. Кöдзыд ваис регыд и вöтліс мянöс. Шонтысим би дорын, сэсса кутім корсьны лыйсян места. Менам кивн вöлі öти ствола пищаль, кодөн дядь ветлывліс вöравны. Васялөн да Ваня вокыслөн кык вылö öти ружье.

И сэки кодкö бара казътыштіс тöрытья кино йылысь. Детинкаяслөн синъясыс югдісны, öта-мöд вежмөн зык-сим, радлім.

— Тэ кö эськö вöлін белöй офицерөн, эн и тöдлы, кыдзи лыйи,— горöді ме дас кык арöса Васьлы, сэсса лэптi пищаль курöксö да метитчыштi детинкалы морöсас. Сійö сулаліс да сераліс.

Тотшкысис-кучкысис пищаль курök. И сöмын сэки менö босьтіс дрöж. Кывйöс шуны эг вермы, пищальöй уси кивсь. Кöть лыйöм шы эз кив, а гөгөрвои: пищальсö öд гортысь петігөн на зарадитлі. Вася видзöдö, ку-тшöма повзи ме, а ачыс нинöм оз гөгөрво. «Гашкö, эз и вöв зарада?»— вензисны думъясöй. Полігтырйи лэптi пищальöс, видзöдлі стволсö: сэнi куйліс зарада патрон. Дрöжжитан чуньясөн перйи сійöс съод ствол пытшкысь да мый вынысь шыбиті тыö.

Бур, мый осечка лои. А лыйис кö? Менö, дерт, нэм чöж кутіс мучитны сөвестьöй. Вины öд детинасö верми либö вöчны калекаөн. Со кытчö вермö вайöдны балуйтöмыд. Та бöрын кык во эг лысьт босьтлыны киö пищальöс.

Платонович, колöкö, та йылысь важөн вунöдіс, а менам ставыс на син водзын. А öд вермис лоны сідз, мый

өні сійө эз пукав пыжын мекөд орччөн, некор эськө эз вермы кывзыны лэбачьяслысь сьылөмсө, уткаяслысь төричаяс пыын герчкөмсө, эз любуйтчы, дерт, шондї петөмөн да мича өшкамөшкаөн, кодъяс нюжөдлөны гөрба пос Эжва вомөн.

Шуда на, тыдалө, вөлөмыд, Васька.

— Гашкө, вывлань кайлам?— шыаси ме пыжын пукалысь дінө.

— Чайтан, сэн уткаяссө көрталөмаось?— Платоновчлөн гожъялөм чужөм кузяыс котөртис нюм.

Сёрнитчим луннас өтлаасьны Норта-вожын.

«Шурс, шурс, шурс»,— водзө писькөдчи ме сук төричаяс пөвстөд. Корсюрө пызан пасьта ю дзикөдз вошлө турунъяс пөвстө, он төд, кодарө и веськөдны пыжтө.

«Мый нө—чөв усин, көкөй? Нолтө лөдсав гажсө! Аддзан, асылыс кутшөм гажа». Ю йылөдзыс каті. Сэсса петі шойччыны ичөтик ді вылө. Муртса на пыжөс кыс-кышті берегө, а нырө өвтис нин дзоридзьяслөн чөскыд дукыс.

Аддзи еджыд гоб. Сійө сулаліс дзик берег дорын: кыз кока, паськыд шляпаа. Вылынджык мөд... коймөд... Öтикъяс пөрысьмөмаось нин, мөдъяс том ичмонь кодьөсь. Вотчысьяс, тыдалө, абу на веськавлөмаось. Пыж ныр тыр воті тайө чөскыд тшаксө. Найөс и збыльысь уткаяс дорсьыд кокныдджык корсьныд.

Сэсса веськалі сьөд сэтөр кустө. Вотөсьясыс чунь пом гырсяөсь, сюян вомад— ачыс сылө. Эг и төдлы, кыдзи шондїыс кайис небеса шөрөдз. Дугдісны лэбавны уткаяс.

Нюжөдчи кыдз бокө, гож сайө. Көнкө дзик пель дорын сьыліс турун пөвстө дзебсьөм чирк. Гоз-мөдысь нин юр весьтөд лэбзис сера бордьяса бобув. Тыдалө, и сылы долыд татшөм поводдянад. Төв кышөдчөмысь надзөник катласисны катшасинъяс, бобөняньяс, быд

дзоридзлөн аслас мичлун, аслас олём. Ичөтик ді вылын эг ме вөв өтнам.

И сэки, небыд турун пиын куйлігөн, мем весиг лои өбиднө, мый мортлөн зэв нин дженьыд нэмыс. Шөр-кодя, шуам, олан 70 во, мөдногөн кө, 613 тысяча час. Мыйла эськө не овны кык та мында, а гашкө, и ещө на унджык. Кутшөм унатор сэки аддзылан ас гөгөрыд, кымын буртор верман вөчны йөзлы, чужан мулы. Да и татшөм гажа местаясас кымынысь на эськө позис пукыштны-шойчыштны.

Ссылөй, лэбачьяс, сьылөй. Кывза ме тиянөс. Ссылөй гажаджыка, дыр мед ог вунөд тиянөс. Коркө өд бара на вола.





ТОМ КАД КАЗЬТЫЛІГՈՆ

Ичӧтдырся другыд торъя муса. Кор казтыштан сійӧс — дум вылад усьӧ бӧрӧ кольӧм вояс. Кызди дӧра сумкаясӧн котравлім школаӧ, тӧвся луньясӧ ас вӧчӧм лямпаясӧн ислав-

лім Макар чойӧд. Гожӧмнас видзлім мӧс, гудыртлім гӧпьяс, кытчӧ ытва дырйи йӧрмылісны пань кузя сирьяс да нильӧг налимьяс. Кымынысь вӧлі купайтчам йирвыв весьтын, сой мудзтӧдз ӧвтчам вугыр шатьӧн, медым кыйны гуринаясӧс да кельчиясӧс. Унаысь варччылас киясыд и кокьясыд. Ветлывлім лиасьны и коляоз сейны, картуз тыр чукӧртлывлім гӧньӧ да шомкор.

Вунӧ ӧмӧй видзьяс вылын юр кыскалӧм, зорӧд бокин узылӧм? Ссылӧмьяс да гажӧдчӧмьяс?

Ичӧтдырся другыд эм быдӧнлӧн. Эм сійӧ и менам. Торьялім ми сыкӧд уна вояс сайын. Война таын вӧлі мыжаыс. Миша служитіс кӧнкӧ Дальньої Востокин, а ме дорйи вӧрӧгысь кытшӧ босьтӧм Ленинград. Кор-

сюрö вежласьлім письмөясөн, но аддзысьны удайтчис сөмын война бөрын нин, и то эз дзик пыр, а во нель-вит мысти.

Кытчö нö вошины варччөм кокъяс, пось картопельөн съодасьөм чужөмъяс? Ме водзын сулаліс эз Мишка де-тина, а шөр арлыда ыджыд да ён моряк. Сы вылын вөлі югыд кизьяса съөд китель, бокас öшаліс кортик-пурт. Сук юрсисö вевттис мича фуражка, пельпомъяс вылас — зарни погонъяс. Чиныс майор.

Михаил Васильевич (майортö Мишканад яндзим нин шуны) локтöма Измаил карсянь отпускö. Ми ськөд дыр ветлөдлім Сыктывкар кузя, пыралім паркö, лэччылім пристаньö. Сёрниыс киссис, кыдзи зэр бөрын жөлөб дорысь войтва. Казытылім төдсаясöс, рөдняясöс, жали-тім найös, кодъяслөн помасис олан туйыс война воясö, кодъяслысь сэсся некор нин ог кывлөй ни сёрнияс, ни серамъяс.

Моряккөд лөсьыд мунны орччөн. Михаил Василье-вич быттö оз моски кузя мун, а восьлалö парад вылын. Стройнöй, пельк. Да, и военнöй паськөмыс сылы зэв ёна мунö, картина вывса кодь — дай ставыс. Нывъяс сы вылö видзөдöны гусьөнникөн.

...Мөд луннас Мишакөд ми мөдөдчим вөрö. Кыкна-нымлөн пицальяс, мышкын öшалöны мешökъяс. Асы-лыс вөлі лөнъ да гажа. Гожся дзоридзьяс удитöмаөсь нин нярмыны, пуяслөн коръясыс вижөдöмаөсь. Муртса пырим вөрö, Мишаос кодкө быттö вежис. Воши сьлөн стрöглуныс и стройнöй походкаыс. Сійö то нетшыштас кутшөмкө дзоридз, то кокнас ылөдз чужьяс шапка пасьта пöрысьмөм тшак. Воас кө шор, чеччыштас во-мөныс, сэсся сьывны горөдлас, лэбачьяс моз шутля-лыштас гораа. Ме видзөда сы вылö да дивуйтча. Ме водзын быттö абу морскöй офицер, а ар дас кыка — дас куима детинка.

— Ок, лосьыд, верма кө эськө сывйышта став пуяс-сө,— радліс гость.— Көнкө эмось өмөй ещө татшөм гажа да муса местаясы! Матө вит во ме эг аддзыв ассыным коми вөр-ва. Төдан кө, кутшөма быри наысь гажөй.

Чукля пипу вылө пуксис гөрд чышъяна сизь, кытшов-тіс пу гөгөрыс, сэсся заводитіс клёнгыны ён нырнас. Миша сулаліс зэв матын да нюмъяліс.

Узим ляпкыдик вөр керкаын. Көть сылөн пытшкөсыс и тшына да съөд, но мянлы гажа. Восьтан өдзөссө да, пыр и син улад усьө төдса пармалөн паськыд отыс, шыввидзө чөв, зумыш. Вот-вот вөйтчас узыны, пемы-дыс дыр кежлө дзевас сійөс аслас войся эшкын улө.

Куим лун да куим вой коллялім ми сэки вөрын. Кытчө сөмын эг волөй! Көть мешөкъясын куйліс нель-вит съөлаөн, но кыкнанным вөлім долыдөсь. Водз асыв-сянь сёр рытөдз вөрөд собалігөн, дерт, ёна мудзлан, но воан вөр керкаө, пуан съөла шыд, юан тшын дука сук чай — и важсьыс ён морт.

Быри вөлөганым, кокняммисны мешөкъясным, колө лэччыны гортө, а Миша та йылысь и сёрнитны оз көсйы.

— Вай өти вой ещө узям. Яй эм, а нянь-сакартөгыд кызкө мыйкө овсяс,— кевмысис отпускник.— Колөкө, бара мый дыра оз удайтчы воыны татчө.

Мый вөчан, ковмис кольччыны. Мем и аслым окота дырджык овны тайө аслыссяма курортас, көні позьө шойччыны дон мынтытөг мыйта колө.

Тайө рытнас вөр керкаө воим водзджык. Ывлаө пестім гажа бипур, пузьөдім чай. И бара заводитчисны сёрнияс-варовитөмъяс. Көть унатор нин казьтылім, но сёрниясыс оз и думайтны помасьны.

— Вылі грезд дорын сир вийөдан гу вөвлі. Төдан?— виччысьтөг юаліс менсьым другөй.

— Көні тай вөлі войнаөн пыр ворсам?

— Вот-вот. И сырчик сэтчө быд гожөм позьявліс.

«Нинөм абу вунөма, а өд сэсянь кызь вит воысь унджык коли. Со кутшөм муса мортыдлы чужан муыд».

— Эн на вунөд, кызди Емваль юысь шниткиясөс кыйлим?

— И тайөс эг вунөд, Миша.

— А суспутө, кодi сулавлис Сьорт грезд дорын? Сэтшөм ыджыд да мича вөли.

— Сийө абу нин, пöрысьмис, пес пыдди сотисны.

— Жаль, а ме кöсий лэччывны видзөдлыны, пукалыштны пушкыра пу улас.

Вөли нин вой шөр гөгөр, чарла кодь төлысь важөн дзевбсис кымөръяс сайө, а ми пыр на пукалим жара ыпьялысь би дорын да надзөникөн сьылим военной сьыланкывъяс, кодъясөс велөдлим на сиктса школаын велөдчигөн. Тайө сьыланкывъяснас, барабан шы улын, ми ветывлим Улыс Човйө, Тентюковө, Зеленечө.

Кор пöлыштіс төв, биным кутіс ломзыны ещө на ярджыка. Моряк чеччис места вывсьыс, өвтыштіс кияснас и ур моз пелька чеччыштіс би вомөн, сэсса мөдысь... коймөдысь... Тадзи жө мөс видзигөн ми радейтім чеччавны бияс вомөн, петкөдлим, кодi медся удал.

Бур, мый миянлысь челядьясьомнымөс некод эз аддзы, серамыв эськө лэптисны либө думайтисны кодi төдас мый. А гажөдіс миянөс войыввса вөр-ваыс, лөнъ арся войыс, чөла вугралысь пармаыс, вөрса сөстөм сынөдыс. Уна во бöрын ми недыр кежлө бара лөлим челядьясөн, устөм-тоштөм, варччөм кокъяса детинка-ясөн. Чинъяс ни арлыдъяс талы эз мөшайтны.

Эк, частөджык эськө паныдасьлыны татшөм шуда кадъяснас.





КАДЬЯ НЮРЫН

Турсянь кё мөдөдчыны Мирон починоклань, джын туяс паныдасяс зыбуч нюр. Тайё вөрса туйодыс волон позьё пройдитны сөмын төв пуксигон, кор кодзыдыс дорас нюрсө. Тани и пуясыс жебиникось, шочось, гогор ылөдз тыдалө местаис.

Арнас, кор пуксясны зэра лунъяс, нюрыс ёна дөзмөдө ветлысь-мунысьясөс, вөралысьясөс. Туй кузяис, медся васөд местаясас, вольсалөмаось потшьяс. Кынмыштас кё муртса, ва пытшкын куйлысь потшьясыс лооны вывті вильыдось. Сэки видзчысь, а то прөступитчан да коскөдзыд тюльгысян кизьөр няйт пытшкө.

Вуджан тайё мустом нюрсө и пыр жө веськалан кыз раскө. Чышкан чужом вывсьыд пөсьтө, долыда ышловзян. Бара на лючки-ладнө удайтчис вуджны, кокъясыд, паськөмыд колины косон. Оні сэсся Чов ю дорөдз позьё осьлавны збоя, васөд местаяс оз нин паныдасьлыны.

Вөлі сентябрь пом. Асывсяныыс ме вөтлыси съоляяс бөрся. Вель ёна мудзтісны мудер пөткаяс. Көть лыйсьыны тыдалис на, мөдөдчи Миронө. Окота вөлі өдйө-

джык воодчыны Чов Ю дорё, пестыны бипур, пузьёды чай, сэсся ужнайтом бёрын пырны ю бокас сулалысь ичотик керкаё да асылөдзыс шойччыны небыд турун вылын.

Сёмын тай нюр колё вуджны. Сідзкё, пось чай йылысь водз на мөвпавны. Лёсьөді беды, медым потшьяс кузя лёсьыдджыка прёйдитны, дзеби истөгос морос зептё. А нюр өвтіс нин аслас васөд сынөдөн, чөскыдтом көрөн.

Друг көнкё зэв матын кыліс болскөдчөм шы. Эг на удит пищальёс лэдзны пельпом вылысь, туй вомөн вуджис йёра. Посныдик пуяс пөвстын сійё кажитчис торья ыджыд да ён. Голясё нюжөдөма водзлань, кузь кокьясыс вёйласисны пыдөдз.

— Бергөдчы, вёян!— ачым эг төдлы, кызди горөдчысис менам.

Вөрса багатырөс тайё кывьясыс, тыдалё, повзьөдісны: кокьяссө кутіс шыблавны өдйөджык. Мыйён заводитас вёйны, лэччысьлас водз пидзөсьяс вылас, мый вынсьыс йөткыштчас бөр кокьяснас. Няйтсө гөгөрбок резё, ныр розьясьыс ру петё. Ме сулала да дивуйтча, кутшөм сюся да кокниа сійё вермө вуджны зыбуч нюрсө. Эз өд вёй, вуджис. Мыйён воис кос местаё, пыркөдіс шыльыд гөн вывсьыс васө, сэсся гөнечөн мөдіс ордым кузя.

— Молодеч. Но и молодеч!

Дырджык эськө видзөдны татшөм серпасьяссө. Та бёрын меным нюрыс эз нин кажитчы мустөмөн да лёкөн. Оти здукөн и вуджи вильыд потшьяс кузя. Кыз раскө вотөдз шойччыны весиг эг сүвтлы.

Тайё лоөмтор бөрас меным унаысь на шуд усьлі аддзывны йёраос. Ылісянь и матысянь. И быд пөрйө тайё ыджыд да мича вөрса пемөсыс кольліс сьөлөм бердө медся бур казьятылөмьяс.

Оти татшом аддзысьлём йылысь окота висьтавны. Суботао, удж помасьом бёрын, ми другкод мододчим Юркино починок. Косйим мод луннас вёравны кочьяс бёрся. Муыс вевттьысьома нин вёсньыдик лымйон. Пукавяс омой татшом каднас вёралысьлөн гортас!

Воим места выло ромыдон. Оти важиник керка дорын тшынарас-трачкодчис бипур. Сидзко, кодьяско узмодчёмаось нин татчо. Найо вёлины кыкон, миян поя Манька ылысянь на кутис увтны тодтом йозос. Вёлмко, карсаяс. Миян моз жо шойччан лун коллявны воёмаось татчо.

Би дорын варовитыштём бёрын разодчалим шойччыны. Ми другкод пырим оти керкао, карсаяс — модо.

Эго на удитой нюждочыны нарьяс выло, кызди Манька бара сетис тодны: локтоны кодьяско. Муяс вывсянь понйос чолёмалис сэтшом жо гончой пон. Миян дзескыдиник жырийо пырисны пицальяса кык морт. Отискосе ме пыр жо тоди: сыкод ми коллявлим тувсов войяс дозмор койтьяс вылын, вель унаысь аддзысь-лывлим чери кыйгон да тшак-пув вотигон. Модыскод, коть аддзи первойысь, вёр керкаад одйо тодмасим.

Дыр на пукалим тшынодысь лампа дорын. Оти бёрся мод кыссисны варов сёрнияс. Поньяс шойччисны пыран комнатаын, тыдало, мудзомаось вёрьясти рисьялом-котралом бёрын. Гашко, и тодоны, мый аски ковмас чеччыны водз да кыв нюжавтодзид вётлысьны тэрыб кочьяс бёрся.

Войыс пуксис лонь да югыд. Ва гураньяс толысь югдодомысь портмасисны ромпостаньяс моз. Чусмыштом енэжас койыштомаось лыдтом-тшоттом кодзувьяс-ос, найо дзирдалоны, гажодоны тодса пармасо.

Пачын пыр на ломалисны огырьяс. Корко тай сэсса унмовсисны жо вёралысьяс. Куси лампаысь биыс.

Ме садми водз. Узян жырийын вёли кодзид. Став шоныдыс пышйома восьса труба пыр ывлао. Ертьясой

ставон узисны. Эг на удит кокъясон тувчыны му джоджө, ывлаын кыліс кок шы, быттьө верзьома вөла матыстчис. Тöлысь югөръяс югдöдісны ылöдз.

Кок шы матыстчис и матыстчис. Сэсся друг дугдіс кывны. Видзöдлі öшиньö и чуйми. Ывлаын, керкасянь куим-нель воськов сайын, сулаліс йöра да чатрöдліс юрсö. Кыскыштіс некымынысь сынöдсö нырнас, сэсся казяліс, мый делöыс абу ладнö, öдйö чепöсйис и кутіс котöртны вөрлань кын му кузя. Тайöс казялісны понъяс, сетісны ассыныс гөлöс. А йöралон дыр на кыліс сьökыд кок шыыс.

Садьмөді пищала войтырöс. Кодсюрö оз веритны. Ковмис корны ставнысö петавны ывлаö. Тадзнад бурджык, кор асланыс синъясон аддзыласны йöралысь кок туйсö, кодъясöс сійö колис лым ывлö.

Öні быдöнлы ковмис веритны. Быттьö мöс кок туй кольöма вöрса олысь керка пöлөн. Көть вöлі водз на, но та бöрын вöралысьяс пиысь некод нин эз ойбыртлы.

Кутшöм нин узьöм! Татшöмтортö он аддзыв быд лун.





КОДНЫС ЁНДЖЫКА ПОВЗИСНЫ!

Ошкыдлөн пасыс небыд, да гыжйыс лэчыд. Да и тушанас природаыс сійос абу ободитёма, вөв сьокта лоо. А пельклун йывсыс и сёрнитны немтор: көсьяс кө, любой мортос суодас. Да и войвылын олысь зверьяс пиын медся ён. Та вөсна, колөкө, и Топтыгиныд вылын нырөн ветлө, вель частө путкылялө вөрысь мыръяссө, лэдзө кучикъяссө медкыз пуяслысь. Пөкөритө йөраяс-өс, вөвьясөс, мөсьясөс. Ошйысьө аслас выннас.

Көть и удал да ён сійө, но мортысь полө, пырджык старайтчө усйысьны, саймовтчыны йөз синъяс улысь. Төдө, буракө, мый Степанкөд либө Иванкөд бурджык не паныдасыны. Торъя нин, мортыс кө пищала либө чера. Сэки нин некутшөм ёнлун ни лэчыд гыжъяс оз отсавны. Олөмтө вермасны босьтны донтөм донысь. Он удит вынтө петкөдлыны, чергөдчан ачыд.

Төлын и гожөмын пася Микайлөысь унаөн полөны — вөралысьяс и вотчысьяс. Да и кызди он пов, кор ичөт-дырсянныд тэнө кутасны повзьөдлыны тайө звернас, кодй быттьөкө быд морт вылө дась уськөдчыны. Мөдарсянь кө босьтны, кор аддзан кытыськө дом йылын

видзан ошкӧс, видзӧдан, кыдзи сійӧ кужӧ йӧктыны да дурны, тешитны йӧзсӧ — гырысьлӧн и челядьлӧн петас серамыд. Ме кӧть быд ар ветлӧдла вӧръясті, а Топтыгин-кӧд эг на паныдасьлы.

Но менам юрын эмӧсь уна висьтъяс, кодъясӧс кывлі Михайлӧ Ивановичкӧд паныдасьлысьясянь. Тані буретш татшӧмторъяс йывсьыс и кӧсья висьтавны.

* * *

Василий Петрович, коді кызь воысь дырджык лесникаліс, гожӧмнас кытшовтӧма ассьыс угоддьӧяссӧ. Рытьявылыс нин мӧдӧдчас гортас. Воас Егӧс ю дорӧ, коді тулыснас ыджыд да визув, а гожӧмнас — шор кодь ичӧт. Кӧсьяс юыштны, но оз удит, посньыдик кыдзьяс костысь петас ош. Аддзас виччысьтӧм гӧстьӧс, сувтас бӧр кокъяс вылас. Ена кодь повзяс олӧма морт, чер ни пищаль сьӧрсьыс абу, бедь сӧмын киас. Пышьян — суӧдас. Мый вӧчны? Ош видзӧдӧ сы вылӧ гырдемӧм ичӧтик синъяснас, оз уськӧдчы ни оз пышйы.

Тадзи сулалісны паныдӧн вель дыр. Ош ӧтар ю бокас, лесник — мӧдарас.

И сэки пикӧ воӧм морт, тӧдӧмысь, ки-кокъясыс аслас дзӧрисны повзьӧмысла, заводитас видзӧдны ошлы веськыда синмас. Ог тӧд, тайӧ-ӧ отсаліс, но повзьӧдчысь зверь друг шыбитчӧма бӧрвыв и мый вынсьыс заводитӧма пышйыны.

«Батьӧ на меным висьтавлывліс, мый некутшӧм зверь оз радейт, кор видзӧдан сылы синъясас, гашкӧ, гӧгӧрвоӧ, мый тэ он пов сыысь», — ошкӧд паныдасьлӧм бӧрын висьталіс лесник.

— Но тэ ӧд и ачыд повзин?

— Сы йылысь Михайлӧ Иванович сӧмын тӧдіс. Пышйи кӧ, мӧд делӧ, — мудера лапйӧдліс синъяссӧ Василий Петрович.

А вот Петровичлөн тӱдсаыс, кодӱ онӱ на олӱ-вылӱ аслас чужан сиктын, быдса верст пышъяс Топтыгинсьыд. Кодӱ сӱӱ да кыдзи шуӱны-вӱйпӱны, эн дивитӱй, ог висътав. Абу лӱсьыд бур мортсӱ янӱдны. Но, а вичсӱ позьӱ казътывны: Олӱксеевичӱн сӱӱс ыдждӱдлӱны. Ыджыд тушаа, ен ныръяса, сӱрнитӱгас неуна мыкталыштӱ.

Олӱксеевич босътас кык лун кежлӱ вӱлӱга, лаз мышкас ӱшӱдас чер, пельпом вылас пуктас куран да коса и мӱдӱдчас Емваль йылӱ видз пуктыны. Кадыс вӱлӱма зев на водз, а местаӱдз абу матын, матӱ куим час вӱрса туйӱд колӱ осьлавны, нййтсӱ и нюрсӱ талявны.

Кор нин матыстчыны кутас аслас видзьяслань, туй вылын тыдовтчас ош. Локтӱ паныд, юрсӱ муӱ ӱшӱдӱма. Олӱксеевичлӱн мышку кузяыс пыр жӱ кодзыд йирмӱг кутӱс гуляйтны. Бергӱдчас и мый эм выныс ставсӱ лэдзас кокъяс вылас. Куран да коса лӱбзясны пельпом вывсьыс. Пышйӱ медся тӱрыб вӱв моз. Оз лысьт весиг видзӱдлыны бӱрас, колӱкӱ, ошкыд дзик нин матын, он и тӱдлы, сьӱкыд лапанас гӱститӱдас.

Котӱртас вель ылӱдз, гашкӱ, эськӱ гортӱдзыс пышйис, но бырӱма эбӱсыс. Сӱки дум вылас усьӱ лаз мышкас ӱшалысь черыс, тӱрмасьӱмӱн кватитас сӱӱс, сӱсся саймовтчас кыз пу сайӱ, виччысьӱ повзьӱдчысьӱс.

Видзӱдлас туй вылӱ, кытӱ сӱмын на пышйис, а сӱнӱ некутшӱм ош абу. Колӱкӱ, сӱӱ Олӱксеевич моз жӱ пышйӱ ачыс.

Танӱ нин сьӱкыд вензьяны, кодныс ӱнджыка повзисны.

Автобусын тыр йӱз: нывбабаяс и мужичӱйяс, олӱма войтыр и том йӱз. Пестерьясысь да кӱрзинаясысь ӱтдор

кодсюрё том йёз пиьсь босьтёмаось и пицальяс. Вермас
ёд и, тшак да пувйись кындзи, съола-тар сюрны. Да и
ружьенад гажаджык вёрад, пыр нин төварыш.

Матё нелямын километр гёгыльтёдіс вотчысьясос
ыджыд автобус. Дивья тадзнад ветлыны, мудзём пыд-
ди шойччан. Воим места вылө, и автобус өти здукөн
тыртёммис. Ставён разёдчалісны паськыд ягьясө,
өтикьяс — тшакла, мөдьяс — пувла.

Ми колим кыкөн: Захар да ме. Захар важөн нин
бритчө, регыд кызь вит арөс тырас. Ён, ыджыд, турун
додь ас вылас вермас кыскыны. И сёрни вылас востер
да збой, кывьясысла зептас оз пырав. Мөдөдчим тракт-
торной туй кузя, кыз позьё ылөдзджык, кытчө
омөльджыка веськавлөны вотчысьяс.

Ме пицала, рюкзака. Захарлөн сөмын ыджыд көр-
зина, кытчө куим ведра вотөс позьё пуктыны. Ас сер-
тиыс и дозйыс.

Мунам, шмонитам. Нимкодясям арся лышкыд парма-
нас. Воим нюр дорө, коді нюзөдчөма код төдас
кытчөдз.

— Адөй, адөй, пувйыс мындөм, коктө пуктыны не-
кытчө,— радліс сійө да өдйө заводитіс копрасьны. И ме
рюкзакысь перйи көрзина.

— Вотчыны кө и вотчыны.

Захар, тыдалө, мыйкө казяліс, кутіс корны менө ас
дінас.

— Кодкө со көмтөг ветлөдлөма.

Косьмөм няйт вылын збыльысь тыдалісны кок туйяс.
Сөмын эз мортлөн, а гөна пася көзяинлөн. Гыж туйясыс
омөля нин төдчисны, тыдалө, лун вит сайын таті ветлөд-
лөма.

Кор ме висьталі, кодлөн тайө кок туйыс, Захарлөн
синьясыс ыдждісны, калькнитіс вомсө, чужөм вылас бы-
дөн вежсис.

— Збыль али мый? Колөкө, көнкө матын ошкыд?—

И вель унаысь кыйкнитліс гөгөр.— Пуляыд нө эм абу коть?

— Эн пов, татчө сійө оз лок,— бурөдышти повзыысь мортос ме.

— Кор нө Семен луныс? Ошъясыд пө сэки гулайтөны, өтчукөрөн ветлоны. Лёкось.

— Бурджык лоө, вотчан кө, а то дозыйд оз тыр,— шмониті ме.

Захар мыйкө дыра бара на гоньялыштіс, сэсся вөлисти копыртчис пув розьяс дінө.

Миянсянь дзик матын чипөстіс съола. Сылы вочавидзис мөд... Пищала мортлы тайө и колө. Пыр жө вуніны сярвидзысь пув чукөръяс.

— Тэ нө кытчө?— веськөдчис Захар, быттьө тшөтш көсйис вөтчыны ме бөрся.

— Вотчы, регыд локта. Съолаяс со чипсасьөны.— Оні вөралысьтө некутшөм вын нин оз вермы кутны: ни Захарлөн шөйөвошөм синьясыс, ни пөльтчөм пув розьяс.

Регыд көсйи ветлыны, да съолаясыд ылөдлісны, матө километр нуисны менө ас бөрсяыс. Ог на удит матыстчыны пу дорө, кытчө пуксяс пөтка, а сійө бара нин казялөма, жбыркнитас-лэбзяс водзө, сы бөрся и мукөдъясыс.

Код төдас, дыр-ө шөйті вөрын, но кор бергөдчи пувъя местаө, Захар некөн эз тыдав. Горзі-чуксаси гөлөс быртөдз,— некутшөм вочакыв. Думаyta, мый мөдлаө кытчөкө муніс, колөкө, таысь на унджык вөтос аддзис. Мед вотчө, вошны тані некытчө, туйыс автобус дорөдз лэччөдас.

Ошөді пищальөс ув йылө, заводиті вотчыны. Съолаясөс кө эз удайтчы кыйны, чөскыд пувйөн көрзинаөс тырта. Дивъя татшөминад вотчыныд, он өти тусьөн, а кытырнад куралан. И поводдяыс лөсьыд, ыркйөдлө небыд төв, малалө чужөмтө, оз лэдз ньылөдны.

Колөкө, дыр на вотчи, но дозйой тыри. Да и воис машина дорө чукөртчан кад. Пув тыра нопйон лэччыны ковмас дыр.

Автобус дорө вотчысыяс чукөртчөмаось нин. Ставныслөн дозьясыс тырөсь, ичмоньяс весиг чышъянъяссө тыртөмаось пувйон да тшакон. И Захар сэни, гөлчитө, гөлөсыс медся ыджыд.

— Кытчө нө вошин?— медводдза юалөмыс вөли сылы.

— Бөр лэччи, дышөдіс вотчыныс. О, а тэ зіля уджалөмыд.

Сэки син улө уси Захарлөн көрзинаыс. Сэни вөли кыккуим гөрд гоб да тасьтйысь на этшаджык пув.

Со и став висьтыс. Эг кө эськө Захарлы висьтав ошкөн кольөм кок туй йывсьыд, колөкө, и сылөн дозйыс вөли тыр.

Дарөм тай ён мужичөй, а полө нинөм абусьыс. А рөкыд вылө кө ош паныдасяс ськөд, мый вермас лоны?

Ассьым висьтъясөс заводиті ошъяссиянь, сійон жө и помала. Лесник Василий Петровичкөд сёр арын ми мөдөдчим вөравны. Асывсяныыс уси лым. Восьлавны сьөкыд. Көтасьөм сапөгъясө сибдіс лым, өдва кыскам кокъяснымөс. А мунны ковмис эз этша. Окота өдйөджык воөдчыны вөр керкаө, медым шойччөдыштны мудзөм ки-кокъяс.

Лым усьө и усьө, небыд, кокныдик, быттьө бобув чукөръяс лэбалөны. Мунам векныдик вөрса туйөд. Ог варовитөй. Василий Петрович шапкаа, ватник вылас зэвтөма патронташ, сэни сярвидзөны өтка пуляяс. Киас кык ствола ружье, бокас сабля кодь кузь пурт. Кокъясыс көть сылөн дженьыдөсь, а восьлалө тэрыба, сьөкыд вөтчыны сы бөрся. «Шурс, шурс, шурс»,— варовитө мян-

көд кокувса лымйыс. «Ланьт, ланьт, ланьт», — окота во-
чавидзны сылы.

И нопьясным съөкыдось: кум лунся вөлөга да пат-
роньяс куйлоны сэни.

— Э-э... Нолтө копыртчыв, видзөдлы, мыйсяма гөсть
тапиктөма.

— Аддза.

Копыртчывтөг бура тыдаліс — ошлөн кок туйыс. Дзик
на неважөн мунөма. Сідзкө, ылөдз эз вермы вешыны.

Василий Петрович пуктіс съөкыд нопсө медся кыз
мыр вылас, пищаль кыкнан стволас суйис өтка пуляяс,
малыштис пуртсө и вөлисти шыасис ме дорө:

— Полан кө, верман кольччыны татчө. Отнам туяла.

Дерт, ош бөрсяйд вөтчөмыд абу чомөр панявны, но
лесниккөд повны ёнасө нинөмысь. Сизим Топтыгинөс
нин сійө вилөма. Паныдасяс кө — виас и көкьямысөдсө.

— Вөтчам.

Здукөн томмис да удалмис Василий Петровичыд.
Тивксөдө кань моз, быттьө сылы абу ветымынөд, а
сөмын на кызь арөс тыри.

Лесник вөчас воськов кызь-комын, сэсся сувтыштлас
да кывзысьыштас. Ме тадзи жө вөча. Сетін кө кыв, эн
шу, мый полан.

Ылөдз нин мунім, а ошлөн паськыд кок туйыс пыр
на тыдалө еджыд да сөстөм лым вылын. Бур эськө, гуө
кө удитис водны, сэтысь кокныдджык лыйныд.

Думайтчысьө, кызди паныдасям Михайлө Иванович-
көд. Төдөмысь, сійө кыпөдчас бөр кокьяс вылас да
равзигтырйи уськөдчас вөралысьяс вылө. Интереснө,
удита ог лыйны ме. Көть и думьясыд лөсьыдось, а кы-
мын водзө мунан, сымын шуштөмджык кажитчө вөрыс.
Төдны эськө водзвыв, көні өні вөтөданторным. Кылө оз,
мый бөрсяныс туялоны сійөс?

Кык ляпкыдик коз дорын ош кок туй друг помасис.

Юждыштёма лымсё мыйдакё, а сэсса кодарё мунёма, он гөгөрво.

Лесник пөрччис юрсьыс шапкасё да мый вынсьыс швачкёбтис муас.

— Мый тэкёд, Петрович?

— Пөръялис мянёс, трасичаыд. Со кызди комёдис, ёлукьясёс.

— Немтор ог гөгөрво.


— Но и мудерпоз! Но и мудерпоз! Век коть дивуйтчы. Медым не петкёдлыны ассьыс гусё, бөрөн со мунёма нель кока рёзбойникыд. Чорыда ылёдліс тэамаёс. Но и но!..

Ковмис бөр бергёдчыны нопьяс дорё. Ывлаыс заводитис ёдйё рёмдыны. Талун, дерт, ош бөрся вётчыны он нин удит. Коді төдас, ылёдз-ё сійё вермис мунны бөрөнсё. Төдёма кө вёлі первойсяньыс, мёдарё эськё вётчим.

Войбыд уси лым. Вевттис-дзэбис ошлысь став кок туйсё. Михайлё Ивановичлысь төвся патерасё ми сідзи и эг аддзёй, коть корсим кык лун чёж.

Ошкыд не сёмын ён да тэрыб, но и мудерьяс рёдысь. Оз быд зверь путьмы мунны бөрөн, медым воштыны ассьыс туйсё.





СЕТІН КӨ ҚЫВ...

Сыкөд ми төдсаоьь матө кызь во. Шөркодь тушаа, чөдлач кодь лөз синьяса, пыр варов да тэрыб — татшөм менам другөй.

Помнита, кызди первойысь сыкөд мунім вөравны.

Тайө вөлі сентябрын. Вижөдөм пуяс вылысь бобувьяс моз лэбисны косьмөм корьяс. Миян юр весьтти, бордьяссө шевгөдөмөн, шлывгисны лунвылө войвылын быдтысьысь дзодзөгьяс. Найө лэбисны тэрмасьтөг, өта-мөдсянныс нейджыд костьясөн. Ми дыр чатөртчө-мөн сулалім вөрса туй вылын да видзөдім дзодзөгьяслысь лэбзьөмсө.

Луныс вөлі аслысьяма-мича да лөнь. Шонді, көть эз нин гожся моз ворсөдчы, но зарни югөрьяснас гажөдіс расьяс да паськыд парма.

Василийлөн вөлі кык ствола ружье. Мышкас өшаліс кокныдик мешөк. Ми көть тайө луннас осьлалім нин матө кызь километр, мудзөм эз төдчы. Сөстөм сынөд-

ыс, арся мича серпасъясыс козьналісны миянлы кыпыдлун.

Эг на вунёд, кызди бадьясөн тырём шор бокысь кыпёдчисны съоляяс да вошины тшем сулалысь козьяс пөвстө. Василийлөн синъясыс öзйисны. Сійö сайёдчис кыз конда сайö, суйис вомас чипсан да пондiс чуксавны съоляясöс. А чипсасис сійö лёка, тöдчö, дзик на первойысь мортыс петöма вөрö... Недыр мысти жбыркнитiс миянлань öти съола. Сійö пуксис пожöм вож вылö, ыджыд да мича. Василий казяліс сійöс, чургöдiс пищальсö, дыр метитчис. Ме эг мешайт друглы, öд вөралысьлөн некор оз вун, кызди сійö лыяс медводдза уткасö либö съоласö.

Ружье съöлыштiс свинечөн, здук кезлö ойöстліс парма. Эз на удит разавны порок тшыныс, а Василий котөртiс нин пу дорö, вом дорас лышкыд нюм. Дыр на сійö эз суй мешöкас ассыс первой трофейсö: то пуктылас муö, то киас босьтлас.

«Лоас таысь вөралысь»,— мөвпалi ме. И эг öшыбитчы. Сэсянь со коли нин кызь во гөгөр, а менам друг быд ар и тулыс прöст кадсö коллялö пармаын. Кытi сöмын кузь кад чöжөн эз восьлавлыны миян кокъяс, кымын сикас ягъяс да пармаяс аддзывлiм ськөд, кымын вөрса юясысь да шоръясысь юлім чöскыд чай.

Овлö сiдз: мудзан, медбөръя сунисöдз кöтасян, кывтö шуны дыш, а другöй пыр варов да кыпыд. Кор нин ёна мудзас, шыасяс ме дiнö:

— Сьылыштам, мый юртö öшöдiн!— и надзöник заводитас гажöдны менö. И сэки вунөдан мудз йывсьыд, кокъясыд кутасны восьлавны тэрыбджыка. Воам вөр керкаö: ломтам пач, топыда ужнайтам, гоз-мöдысь юам чай, и бара важсьыс ёнöсь.

Чеччан асывнас, видзöдлан ывлаö — сьөлöмыд вильысь корö öдйöджык петны кузь туйö.

Миян дедъяслөн, батъяслөн, кодъяс войдөр вердчыв-

лісны прёмыс помысь, вёлі некодён гижтём закон: сетін кыв — пёрт олёмә. Ог помнит сэтшөмтор, мед эськө тайё законсө торкис коркө менам другой.

Кольём во арнас другкөд лосьодчим кайны Турлань, көні миян эм вөр керка. Шуим, мый ме кая субөтаө асывнас, а Василий локтас сэтчө удж помасьём бёрын. Туйыс и вёрыс кыкнанымлы тёдса, эг этшаысь ветлывлөй сэтчө. Пётка сэни уна, позьё и сьёлаясө лыйлыны и таръяс да дозмөръяс бёрся вөтлысьны. Оти кывйөн кө, шойччан лун коллялам гажаа.

Субөтаө ме чеччи водз. Оз од узьсы, кор мөдөдчан вөрө. А водз чеччөмысь кайөта некор оз босьт: унджык пёткаөс аддзылан, ылөджык удитан восьлавны дженъидик арся лунө.

Муртса на удити пырны вөрө, сьвкнитіс көдзыд зэр. Сідзкө, немтор талун и сёрнитны вөралём йылысь. Кыпыдлун быттьё эз и вөв. Көть бөр бергөдчы гортад. «Гашкө, кобас, арнад од дасысь вежсьылө поводдяйд, то бөрдө, то сералө». Сулышті сук вожъяса коз улын— и восьлалі водзө.

Скөр айка моз скөрмөма поводдяыс, оз и көсьы бурасьны. Букуш ывлаын быттьё ставыс кулөма, он кыв ни борд шы, ни лэбачьяслысь сьылөмсө.

Вель дыр ковмис косьтысьны вөр керкаын. Эг и төдлы, кызди пемдіс. Отнамлы, тыдалө, ковмас коллявны войсө. Татшөм лёк поводдяён, дерт, Василий гортсьыс оз пет. Отчид көть, а торкас сетём кывсө.

А думён век жө виччыси сійөс. Көть и эг ёна эскы, а виччыси.

Кор дзикөдз нин пемдіс, некымынысь петалі ывлаө, гөлөс быртөдз горзі, чуксалі другөс, мися, пемдіс мортыд, ылавны вермас.

«Пөръяліс, эз лок, зэрысь повзис, а ачыс ещө көсьысьё,— шуаси друг ылө.— Тадзи өмөй вөралысьяс вөчлөны?». Колөкө, дыш лои другойлы петны шоньд

керкаысь. Пукалӧ, кӧнкӧ, ӧні гортас да сералӧ ме вылын. А, гашкӧ, и гӧтырыс эз лэдз.

Прамӧй узьӧм кӧть и эз вӧв, но чеччи водз. Асылыс лӧнь да мича. Тэрмасьӧмӧн юышти чай, ӧшӧді пельпом вылӧ пищаль, мӧдӧдчи вӧравны. И бара дум вылӧ уси другӧй. Буретш тайӧ местасьыс некымын во сайын Василийкӧд аддзылім санӧс. Зверь пируйтис ошъясӧн джакӧдӧм вӧв туша вылын да мянӧс аддзӧм бӧрын неокотапырысь тімликтис-пышйис вӧрӧ.

— А-у-у!— виччысьтӧг кыліс горӧдӧм. Гӧлӧс сертиыс ме пыр жӧ тӧді другӧс.

— Вася-а-а! Чӧрт пызь, татчӧ лок!

Пукси мыр вылӧ да куті виччысьны. Регыд и мыччысис другӧй. Паськӧмыс кӧтасьӧма, сапӧгыс няйт. Лолаліс сійӧ сьӧкыда: мудзӧма. Чужӧмыс быдсӧн пемдӧма, синьясыс жугыльӧсь.

— Проклятӧй зэр. Вужля бердын ковмис узьны. Коктыр ва. Пемді, туйсӧ вошти.

И дыр висьталіс, кыдзи сійӧ тӧрыт писькӧдчӧма вӧр керкалань. Синьяссӧ куньлытӧг, войбыд, плащӧн вевтьысьӧмӧн, куткырвидзӧма вужля бокин, вӧр керкасянь нель километр сайын. Мем жаль лои другӧй. Тӧда, кутшӧм сьӧкыд коллявны кузь арся войтӧ сап пемыд вӧрын, кор дугдывтӧг зэрӧ да кӧдзид.

— Ме чайті, тэ он лок.

— А кӧсйыси да...— вочавидзис Вася.

Поводдя бара лӧкмис; дзик ӧти сьӧлаӧс и удайтчис лыйны тайӧ луннас сылы. А мудзыс сюри пӧттӧдзыс.

Ставсӧ кӧ лыддыны, кык луннас комын километр восьлалім вӧрса лӧк туйясӧд.

Кӧть и таӧдз ме бура нин тӧді Василийӧс, но ӧні быттьӧ тӧдмалі сійӧс выльысь, ещӧ пыдысянджык.





*

ӨТКА ЮСЬ

Ми пукалім берег дорын да виччысим Котласысь локтысь первой теплоход. Ыдждома-паськалома тулыс-өн шонтөм Эжва. Гудыр ва ыджыд вынөн шлывгис увлань, аскөдыс нуис керъяс, лөпъяс, ставсө, мый удитас нетшыштны берегъяс дорысь, сывйыштны видзьяс да тыяс вылысь.

Асылыс көть вөлі и көдзыд, но би дорын кылісны гажа сёрнияс. Өтикъяс гаралісны тавося поводдя йылысь мойдъяс, висьтасисны, кытчө да мыйла мөдөдчөмаось. Теплоход виччысьысьяс лыдын вөліны и вөралысьяс, кодъяс волөмаось татчө Сыктывкарсянь, медым пукавны тар койт вылын да кывзыны вөрса пукъяслысь сьылөмсө. Төдчө, мудзөмаось найө, вугралөны шоныда онялысь бипур дорын. Некод эз төд, кор мыччысяс Эжва вылын теплоход. Гашкө, час-мөд на ковмас виччысьны сійөс.

Ю сайын тыдаліс скөвөрөда кодь гөгрөс ыджыд ты. Кор шонді содз тырнас койыштіс асьыс лучьяссө вөрва вылө, тыяс кутіс кажитчыны югыдджыкөн, ыджыдджыкөн. Кузь лыа көса, кодөс ойдөм ва абу на удитөма

дзєбны-нвылыштны, торйөдіс тайө тысө вильыш Эжва-
ысь. Кольө некымын лун, и найө нюжөдасны кисө өта-
мөдныслы, өтлаасясны.

Би дорын пукалысьяс дорө матыстчис дженъыдик
жакета неыджыд тушаа нывбаба. Сійө здоравйтчис
төдтөм йөзкөд, сэсся пуксис чемодан вылас, и сөмын сы
бөрын шыасис пицалая том морт дорө, коді пукаліс
йөзсыс бокинджык:

— Тыас со юсь пукалө, а тэ он и аддзы,— шуыштіс
сійө да вөснъыдик кисө нюжөдліс юсайса ыджыд ты-
лань.— Эк тэ...

Сьөкыд вөлі гөгөрвоны, шмонитө нывбабаыс али
висьталө збыльтор, но мыйлакө ставөн кутісны видзөд-
ны бузгысь ю сайө.

— Збыль тай, сөкъя тшак. Но и но!...— горөдіс том
морт и мыйлакө босьтіс киас пицальсө.

Ты шөрын пукаліс өтка юсь. Көть сійө вөлі мянсянь
вель ылын, зэв бура тыдаліс сылөн крукыльтчыштөм
голяыс, ва вывсянь кыпөдчөм мышкыс. Юсь то кывтыш-
тас водзлань, то сунгылас көдзыд ва пытшкө сой кызта
голясө. Мойдын кодъ, быттьө еджыд парус ва вывтіыс
ветлө.

Өні нин став сөрняясыс пансисны тайө тшап да мича
пөтка гөгөрыс.

— Коймөд лун олө ты вылас, некытчө оз лэбзы,—
бара кыліс нывбабалөн чырыштөм гөлөс.— Пөвсө, ты-
далө, виөмаөсь, вот и шогсьө.— Сэсся сійө ыджыда
ышловзис.— Ачым төда, кызди өткөннад овны.
Ок-ок-ок...

Нывбаба дыр висьталіс, мый лыян кө энъ юсьөс,
айыс кыпөдчас кытчөдз вермас, а сэсся шыбитчас бе-
рег вылө, медым вины асьсө. Ог төд, мыйкө эм абу
тані збыльторйыс, но некод эз вомав төдтөм нывбаба-
өс. Вывті нин сійө сьөлөмсяньыс висьталіс.

— Кодлөнкө өмөй кыптас кыис вины татшөм гежөд

пёткасё,— шыасис том вөралысь да синъяссё вештывтөг дыр видзёдіс лёнь ты вылын гуляйтысь юсь вылө.

Вөралысьяс пөвстын ветлөдлөны уна сёрнияс, казьтылөмъяс войвылын быдтысьысь юсь йылысь. Лым кодь еджыд гөна, ён бордъяса кузь голяа юсь воө татчөс местаясё мукөд пөткаясысь да лэбачьясысь ёна водзджык. И найө, кодьяслы удайтчылас аддзывны татшөм пөткасё, дерт, дыр оз вунөдны. Көть юсьлөн яйыс и чөскыд, но прамөй вөралысьяслөн некор оз кыпты кыныс найөс лыйны. А өні тайө шоч пөткасё видзё закон, сы вылө дзыкөдз дугөдөма вөралөм.

Ме ёна радейта вөравны, тулыс-арнас быд во вольвла пармаясё да тыяс вылө, но некор эз удайтчыв матысянь аддзывны найөс. Тайө сюсь пөткаыс оз сибөд ас дінас мортөс, ылысянь на казялас тэнө.

Арнас частө позьө казявлыны юсьяслысь лунвылө лэбзьөмсө. Видзөдан өта-мөд бөрсяыс шывгысь пөткаяс вылө и мыйлакө шог быдөн босьтлас. Од юсьяс аскөдныс нуоны тшөтш став сійө мичлунсө, кодьясөн озырөсь миян пармаяс, тыяс водз арын. Войвывса гөстьяс мунөм бөрын регыд и заводитчасны зэра, көдзыд луньяс, вөр-ваыс оз нин ло воддзакөдь кыпыд.





ЫЛІ ВӨРЫН

Пармаёй, донаёй! Этша өмөй ми ветлам тэнад паськыд отъяс-öd! Тулысын и арын, гожомын и толын. Кымын пөлөс казтылөм вайлам асланым сьөлөм бердын, тшынасьыштөм, сьөкыд рюкзаць-ясын, көнi тшак-вотөсысь өтдор куйлісны вунөдлытөм серпасъяс, выльысь-вьель мичлунъяс, кодъясөс позьө аддзыны сөмын вөр-ваысь. Ыджыд ноъяд өд унатор төрө.

...Вот-вот шондi сунгысяс-дзедьсяс вөр дi сайө. Төда, и сийө мудзис, колө шойччыштны. А ми пыр на ветлөд-лам вөрөд, көть позьө нин узьмөдчыны кутшөмкө мелi-джык коз улын либө зорөд бокө.

— Захаро-о-о-в! О-о-о!

Другөй эз шыась. Тыдалө, кольччис, көнi чипсасис-ны сьөлаяс. Дыркодь кывзыси, оз-ө кыв лыйөм шы, но вөрса чөвлунсө некод эз торк.

Захаров, дерт, прөста эз кольччы. Сидзкө, аддзис

пөткаясөс. Лыяс сьоласө либө тарөс, сэсся вөлись нин сетас гөлөссө, суодас менө.

Пройдиті кос яг, кодлысь муяссө веттьома еджыд яла.

Недыр муныштөм бөрын тыдовтчис восьса места. Сэні сулалісны чөла гырысь пожөмъяс. «Мый татшөмыс?» Пөрөм пу бокин тыдаліс вөв туша. Ошлөн, тыдалө, уджыс. Вель ёна нин сэні пируйтөмаөсь зверьяс да раяс. И со өні кодкө чөсмасьө.

Тайө тай сан. Пратьмөм гөнъяса, дженьыдик кокъяса горш зверь. Ме көть сысянь сулалі кызь воськов сайын, зверь эз и думайт пышйыны, тыдалө, ёна тшыгъялөма. Жаль, өтка пуля сьөрысь абу, посни дрөбнад сылысь кучиксө весиг он розьөд.

Сан скөра видзөдліс мелань, гурчнитіс ён пиньяснас, вөв туша бердысь нетшыштіс яйтор и сөмын сы бөрын пышйис вөрө.

Мыйкө дыра мысти локтіс татчө и Захаров. Ме висьталі сылы сан йылысь.

— Кольччам кыйөдчыны, сійө бара на локтас яй дорад. Менам и картеча зарадъяс эмөсь.

Кольччим. Пемдытөдзыс пукалім, кынмим, а виччысянторным сідзи и эз петкөдчыв. Колөкө, көнкө пукалө мянсянь зэв матын да виччысьө, кор мунам. Сійө өд войся зверь, пемыдыд сылы отсасьө.

Кор енежсянь уси му вылө сьөд шебрас, эновтім кыйөдчан местанымөс да мунім кос дзиб вылө, узыны ноддя дорө.

Войвывладорсянь шлывгис мисьтөм сьөд кымөр. Недыр мысти кымөръяс костөдыс югнитліс чардби, сійө лэчыд коса моз визьнитіс кузь лентаөн, быттьө кымөрсө көсйис поткөдны кык пельө, но эз тырмы выныс. Мурөстіс муртса кывмөн, сэсся бөр лөнис.

Чардбиыс садьмөдіс дзевсьөм төвсө. Ноддясянь кайысь тшын то лэччылас увлань, то качлас вывлань.

Нярзьом пу коръяс торйодчисны пуяс бердысь да сынодас бергалігтырйи модісны лэччавны му вылө.

Ён төв мыджис вуткыртысь кыморсө, тыдалө, эз косьи лэдзны тодса парма весьтө. Заводитіс вурунос моз летны да нетшкыны сійос.

А кымор регыд мысти и збыльысь вежис ассьыс мунан туйсө, кутіс ылыстчыны шуйгавылө.

Ыргөн пөртйын броткодчис-пинясис пузьом ва, тшөктіс идравны асьсө таган вылысь.

Чай юом бөрын вылысь пансис сёрни сан йылысь.

— Ёні, төдомысь, сійө бара пируйтө вөв туша вылын.

Уна пакөсть вермө вөчны сан. Көть кокъясыс дженъидөсь и кажитчө ньөжмыдөн, а сёян корсьом могысь войбыдөн вермас вөчны уна дас километр. Ачыс абу ыджыд, но оз пов уськөдчыны медся ён зверьяс вылө, весиг йөра сыысь полө. Зверьясөс кыйөдө, кор найө узьоны, либө виччысьтөг чеччыштас пу вывсянь да вундас голясыс сөнъяссө.

Ёна дөзмөдчө сійө и вөралысьяслы: лэчьясысь гусявлө сьолаясөс да тарьясөс, петляясысь да капканьясысь перьялө урьясөс, көчьясөс.

Мудерлуннас босьтө. А мудерлуныс санлөн ассьыс водзджык на чужлөма.





ТАЙКӨ ШАПКАТӨ ПЫШЙӨДАС...

Вөралігад унатор аддзылан, кывлан. Мукөд дырйи чуймөдас тәнө кутшөмкө зверь либө пөтка. Овлө и сідз, мый вөрын лоөмторьяссө кутан казтьивны уна вояс чөж, частө петавлас и серамыд.

Пукалі ме кызкө өти шор дорын, ас вөчөм чипсанөн чуксалі сьөлаясөс. Вөлі рытьявыв нин. Шорсө өтармөдарсяныс топөдөма кык джуджыд кыр, бытьтө көсйөмаөсь сійөс дзевны йөз синьяс улысь. Шор бокрын быдмысь дзоридзьяс воштөмаөсь нин асьыныс мичлунсө, кузь турун, кодөс тані некор оз ытшкывны, копыртчөма му бердө, бырөма выныс.

Сьөлаөс чуксалі вель дыр. Сійө көть пукаліс көнкө зэв матын, весиг шочиника сетліс гөлөссө, но вөралысь дорө матыстчыны эз көсйы. Гашкө, шойччыны пуксис сук лапьяса коз вылө да эз вөв окота энотны асьыс местасө. Колөкө, суюсь пельясыс кылісны, мый чуксалө сійөс оз сьөла, а пищала морт.

Ляпкыдик мыр вылын пукавны вöлі меным лöсьыд. Посньыдик сук понöльяс видзисны тöлысь. Сюйла вомö дозмөр бордйысь вöчöм чипсан, чипöста энь сьöла гөлöсөн нель-витысь, сэсся кывзысьыштла.

Сьöла важөн ланьтис, колöкө, мөдлаö лэбзис, а ме пыр на кори сійöс ас динö. Тыртöм киён абу окота лэччыны гортö. Да и шойччыштны тайö вöрса улöс вылас абу грек: водз асывсяньыс öд эг этша километр восьлав нюръяс да парма кузя.

Бара заводити чипсасьны. Мышладорсянь регыд кылис кутшöмкө ыджыд лэбачлөн борд шы. Эг на удит бергöдчыны, кызди шапка кузя шаркнитис кодкө, и сійö жö здукас чардби моз тювыштис вывлань варыш. Öдйö чургöди пищальöс, кöсийи лыйны повзьöдчысьöс, но лыйны эг удит: воши-саймовтчис.

Со сійö пуксис медджуджыд коз вылас, мясянь вель вылын, дзоргö-видзöдö гөгөр. Ылалас кө кутшöмкө лэбач, тшапнитас-кутас öти здукөн. Матигөгөрса лэбачьяс казялисны асьыныс врагсö, пышйисны ылöджык.

Тайö вöли дозмөр варыш. Бордьясыс паськыдöсь, бöжыс кузь. Полöны сыысь кöчьяс, урьяс, сьöдбöжьяс, ластаяс, сьöлаяс, тарьяс, томиник дозмөрьяс. Оз радейтны сійöс некод, быдөнлы асьыс грöзсö кужöма пуктыны. Аддзас кө, джагöдас чипанöс и петукöс, ни нёмөн оз лыддьысь. Сэтшöм сійö лёк да ковтöм.

Дыр кысси джуджыд козлань. Ачым полі, мед эськө дозмөр варыш оз казяв да лэбзьы. Недыр мысти пищаль сьöлыштис свинечөн. Гырдемöм синьяса варыш шнөпкысис-уси муö. Лэбачьяс мынісны ещö öти врагысь. Оз нин ковмы налы сыысь повны.



ЛУНВЫВСА ГӨСТЬЯС

Ичөтик ю бокин сулалө важник өтка керка. Вевтыс киссьөма, өшиньясыс жугласьөмаөсь, лун и вой сәті төв гуляйтө. Корсюрө керка пытшкас вугралөны да дзедьсясьөны көдзыд төлысь вөрса лэбачьяс. Важөн нин тані некод оз ов. Сөмын тулыс-арсө, кор заводитчас вөралан кад, узьмөдчылөны пицалая войтыр. Дерт, оз киссьөм керкаас, а орччөн сулалысь ичөтик жырыын, кодөс лесникьяс лөсьөдісны. Сәні и пач эм, позьө косьтысьны, пусыны. Весиг крөватьяс сулалөны. Вольпась пыддиыс чөскыд көра турун, гортын моз узян:

Пөчинок гөгөрын тыдалө паськыд эрд, муяс сәні коркө вөвлөмаөсь, но өні ставыс эжмөма. Важ керкасянь неылын тыдалө ыджыд кызд. Төдөмысь, садитлөма сійөс тайө керкаас овлысь көзяиныс. Ачыс, гашкө, комын во сайын кувсьөма, а пуыс быдмө, гожөм и аргажөдө татчө узьмөдчысь йөзөс.

Радейтоны эрд вылын сулалысь отка кыздсё и лэ-
бачьяс. Сэтчө то пуксяс кузь бõжа сырчик, то лосьыд
гөлõснас дыр лывкйõдлас-сьылас гõрд морõса жонь
либõ ичõтик зиль пыста. И катша-ракалы муса тайõ
пуыс. Пуксясны медся йылас, чатрõдлõны юрнысõ,
весалõны няйтчõм кокъяссõ да ныръяссõ.

Ю бокин татшõм жõ мõд кызд. Сийõ сõмын первойя
сертиыс неуна ичõтджык. Кор вевттьыясны найõ не-
быдик коръясõн, кудритчõм юрсиа нывъяс кодъ лоõны.
Еджыд кокаõсь, тыдалõны ылõдз. Кыпõдчыштас ко-
дарсянькõ тõв, и пуяс заводитасны варовитны õта-мõд
вежмõн. Зерыштас, и коръясыс кутасны лõставны, кыт-
чõдз шондi югõрьяс оз нюлыштны на вылысь васõ.

Оз кольлы ни õти тулыс да ар, медем ме аслам
вõралан другъяскõд эг узылõй тайõ пõчинокас. И кыйсян
местаясыс танi тõдсаõсь. Съõла-таръястõ позьõ аддзыв-
ны керкасянь зев матысь. Муныштан кõ важся трактор-
нõй туй кузя лунвывланы, эм ыджыд тар койт. Унаõс
тайõ койтыс тулыснас кыскõ ас дiнас. Воывлõны сэтчõ
и карса вõралысьяс, и Эжваса да Вылыс Човса кыйсьысь-
вийсьысьяс.

Ю бокса гõпясын быд во быдтысьõны гордаяс,
жыдачьяс. Тувсов войясõ дзик керка дорõдз воывлõны
кõчьяс. Татчõс местаяс озырõсь чõдйõн да пувйõн,
путникõн да гõрд гобõн. Обедõдз кõ вотчыны, медся
ыджыд пестер позьõ тыртны тшакõн.

Юлõн мõдар бокõдыс нюжõдчõма лежньõвõй туй, во
кык-куим сайын на сэнi журъявлiсны вõр кыскалысь ма-
шинаяс. Арся пемыд войяснас машинаяс повзьõдлiсны
югыд бугыльяснас туй пõлõн узьмõдчысь зверь-пõткаяс-
õс. Онi тайõ туйсõ энõвтiсны — тыдалõ, вõрыс быри,
вуджисны мõдлаõ.

Кольõм во тулыс/ме бара волi татчõ. Окота вõлi
пукуштны тар койтъяс вылын да кывзыны вõрса петукъ-
яслысь сьылõм-гажõдчõмсõ. Юыс ойдõма, берег дорас

он вермы матыстчыны. Ковмис вуджны керъяс вылын.

Матыстчи важиник керка дорё, синъясёй паныдасисны кызкёд. Сулалё менам важ тёдса, дзоньвидза, некодлөн абу лыбёма кыис пёродны сійёс. Но мый тайё? Коръястём пу вылын тыдалё кык скворец поз. Видзёдлі ю дорын сулалысь мёд кызды вылө — и сэнi татшём жё скворечникъяс ошалёны. Нюмёй весиг петіс. Бур делё кодкё вочёма: гашкё, экспедицияын уджалысьяс, а колёкё, и вёралысьяс. Котъ кодi эз вёв, а мортлөн тайё уджыс ошкана. Оз мешайт аттьё сылы таысь висьтавыны.

Эг на удит помёдз ошкыны тёдтём мортёс, кызди юр весьтёд лэбисны скворец гозья да пуксисны кызды вылө. Воманыс налөн тыдаліс кос турун чирьяс. Съёд лэбачьяс пиысь отиыс тюркнитіс-пырис пу йылын ошалысь позйё, сэсся оти здук мысти бёр нин петіс. И мёд скворецыс регыд вошлі сэтчө. Поздысьёны. Сідзкё, быдтысьны-рөдмыны кутасны.

Лунвывса гостьяс поздысьёны и мёд кызды вылын ошалысь скворечникъясё.

Шондiыс саймовтчис нин лөзөдысь вөр сайё, а ылі муясысь воём скворецьяс пыр на уджалісны — кыскалісны выль патераясас гөнторяс, косьмём корьяс, кольём вося турун чирьяс. Сэсся, тыдалё, мудзисны. Пуксялісны кызды вожьяс вылө, заводитісны сывны, кыпыда, сьёлөмсянныс.

Регыд мем удайтчис овны сэки тані. Шойччан лун помасис, уджавны колё вөлі лэччыны. Но вөрө овмөдчысь скворецьяс унаысь на усьлісны дум вылө карын.

Гожёмнас, мыйён кисьмис-воис чөд, ме пукті рюкзакё нейджыд көрзина да выльысь мөдөдчи тёдса пөчинокё. Юыс жар шондi водзын пакталёма-чинёма, пыдөссъыс весиг изьясыс тыдалёны.

Керка дорын сулалысь кызды дзебёма скворецьяслысь позьяссё аслас помтём-лыдтём корьяс пытшкё, ылысьяныс он и аддзы.

Лунвылысь воом гостьяс быдтысьоны. Дугдывтөр лэбалоны видзяс вылө. Ваясны воманыс гагйос либө лёльөөс и пыр жө юрсө сюясны скворечник розьё, көні мам-батыслысь виччысьоны сёян небыдик гоньяса скворец пиян. Паськөдасны найө вижоват вомсө, ота-мөд вежмөн горзёны, корёны мыйкө чөскыдджыктор. Скворец гозьялы некор шойчыныс, жбыръялёны бөра-водза, гашкө, асьныс оз убелитны немтор сёйны, ставсө кыскалёны пияныслы. Лоин кө мамөн либө батыөн — пияныд медся донаось. Ас йывсьыд поэё и вунөдлыны.

Арнас ме ещө на аддзысьлі вөрын овмөдчысь скворецьяскөд. Вөр керкаын узьом бөрын петі ывлаө. Вөлі дзик нин югыд. Войвывсянь пөльтіс көдзыд төв. Он и төдлы, регыд лым чирьяс петасны. Медся джуджыд кыддзын пукалісны матө кызь скворец. Гашкө, найө шойчисны кузь туйө петөм водзвылын. Недыр мысти ставныс кыпөдчисны төдса пу вылысь, сэсся пөчинок гөгөр вөчисны кымынкө кытш и чукөрөн лэбзисны лунвывлань.

Та бөрын ме найөс эг нин аддзыв. Жаль, мый туйө петөм лэбачьяслы весиг эг путьмы шуны гоз-мөд мелі кыв.

* * *

Өні ме бара виччыся тулыс. Вөралысьыдлы тулысарыд медся ыджыд празник. Төдөмысь, сэки выльысь ветла ылі пөчинокө. Сьөлөмөн кыла: лунвылысь воасны сэтчө и менам бордья другьяс. Налөн өд тані мөд горт.

Локта вөрө ог тыртөм киён. Лөсьөді нин лунвывса гостьяслы выль своречник. Мед овмөдчасны унджыкөн. Гажаджык лоө вөр-ваын.





БЫД МАМЛЫ ПИЯНЫД ДОНА

Ылыса пармао, кодос зверь-пөткаясыс гажөдісны уна вояс, воисны йоз. Заводитісны стрөитны олан керкаяс, медым сэсса сэтчө вермисны овмөдчыны вөр лэдзысьяс. Кольо неуна кад, и тані кутасны юравны машина горьяс.

Сулалісны медводдза гоҗся луньяс. Войясыс пөшти эз и пемдивлыны, лөньөсь, югыдөсь.

Вөрын батыскөд тшөтш оліс и ар дас кыка, ичөтик ныр-вома Толя. Би дорын узьлігөн көть корсюрө сійө и дөзмывлө, но оз норась. Батыс өд оз вөлі босьт сійөс, ачыс мырдөн-сорөн вөйысис.

Толя строительяслы то чай пузьодас, то лэччылас ичөтик ю дорө вугравны кельчиясөс да мыкьясөс. Пукалас сэні час-мөд, сэсса бөр мөдөдчас черьясөн то-тшкөдчөм шыө.

— Талун нө пусьодас оз, молодец-удалеч?— Толялысь юасисны батыскөд уджалысьяс.

— Кызь кык чери кыйи,— ошйысис вуграсьысь.

— Сідзкө, рытнас пөсь сөян кутам панявны,— сөмын тай йөршыд абу шедөма-а, нелямын ведра юква

эськө позис вöчны,— гөлчитісны керка лэптысьяс.

Кызкө өтчид Толя векныдик ю пөлөн кайис ылоджык. Чери мыйлакө талун эз шед. Купайтчан көть, да ваыс көдзид. Сөмын на өд июнь пуксис. Бөр нин көс-йис бергөдчыны батыс дінө, но буретш сэки, пöшти дзик кок увсьыс, лэбзис сьöла.

«Поз, буракө, эм»,— думыштис Толя и кутіс видзöдны мыр улö. Сідзи и эм — поз. Сэні куйліс вижоват рöма пемыд гөрд чутьяса квайт кольк. Сьöла, тыдалö, буретш пöжöма найöс.

Детинкалы сэтшöм окота лои тöдмавны, локтас оз бөрсö сьöла. Корсис матігөгöрысь саймовтчанін, дзедсис сэтчö да кутіс виччысьны. Тасянь сылы бура тыдаліс өтка мыр, код улö пöтка вöчöма ассьыс позсö.

Виччысьны ковмис регыд. Сьöла бөр воис аслас позйö. Эз лэбзьöмөн, а котөртіс муöдыс. Позьяс пыртöдзис видзöдліс гөгөрбок; кывзысьыштіс и сөмын сы бөрын надзöникөн пуксис колькьяс вылас.

Толя места вывсьыс эз вөрзыв, полис ёнджыка лавны. Сысянь вит-квайт воськов сайын куткырвидзис сера сьöла. Юр вылас сылөн дженныдик сорс, ичөтик гөгрөс синьяссö кытшовтөдöмаөсь гөрд визьөн. Морөсыс и бокьясыс вевттысьöмаөсь рудоват да сьод гөньясөн.

Детинка надзöникөн петіс пуяс сайысь, вöчис кык воськов сьöлалань. Позйын пукалысь эз лэбзьи, полигтыр видзöдіс Толя ыло, быттьö көсйис шуны: «Мый нö дөзмөдчан, абу өмөй жаль менам посныдик пияныс?» А ачыс ещö на ляпкөдчис, синьяссö оз вештыв детинка вылысь. Зэв матö сибөдіс, бордьяснас тупкөма ассьыс пöжанторьяссö. Оз лэбзьи ни пышьи, картузнад көть тупкы.

Толялы жаль лои раминик сьöлаыс. Вешйис бокөджык и надзöникөн кутіс ылыстчыны. Век жö ачыс видзöдлывліс өткөн сулалысь мыр дорö.

Кор воис строительяс дорё да висьталіс вёрын аддзылёмторсё, батыс өлөдіс сійёс:

— Оз ков вөрөдны, мед бытысьё, рөдмөдө пиянөс.

— Эн матыстчы сы дорё, синъястө кокыштас,— шмонитіс кодкө рабочёйяс пиысь.

— Чайтан, пола? Жаль сөмын сійё меным, а то кутны верма.

Коли кык лун. Тайё каднас детинкалы унаысь усьлі дум вылас сьёла-мам. Эз терпитсый, бара мөдөдчис ю дорё.

Тыдовтчис төдса мыр. Кок чуньяс вылас заводитіс матыстчыны сэтчө. Кор мырйыс вөлі дзик нин орчөн, кыйкнитліс сэтчө. А сэні некод абу, сөмын кольк кышьяс позьяс туплясьоны.

Гүгөдіс зепсө, кытчө пуктыліс зөр шыдөс да няньторьяс, медем вердны сьёлаөс. Вөлөмкө, весьшөрө и локсьөма. «Өдйөджык дзёбөма пиянсө, көнкө, думайтө, босьтас пө. Ме эськө видзөдлі сөмын»— думайтис детинка.

Өні, көнкө, ягса нөрысьясөд мамыс бөрся котралөны шочиник гөньяса, Толя кулакысь на посныдик квайт сьёла пи да велөдчөны овны-вывны, зверьясысь да кырныш-варышьясысь дзёбсясьны.

Кольө вежон кык, и ставныс найө кутасны лэбавны. Бара жө мамыс тайөс велөдас. Сэки нин найөс он кут.





НЯРБОРД — ВОЙСЯ ЛЭБАЧ

Кужомаоьс тай сетлыны коми войтырыд тайо лэбачыслы нимсö. Сылон бордясыс и збылысь нярöсь, омольоьс, бытьö öш гаддысь зэвтöмаоьс. Инмас кө нярбордйид борднас

ёсь беддьö — öти здукон и потö.

Нярборд ичотик, зато, кор шевгöдö бордяссö, кажитчö ыджыдöн. Шыр кодь лэбачöс бордясыс и вердöны, ковмас кө, отсаласны пышйыны ас дорсыс ёнджык лэбачьясысь.

Уналаын тайо войся лэбачсö шуоны лэбалысь шырöн. Оз жö прöста тадзи нимтыны. Сийö зэв ёна муно шыр вылö.

Кöни сийö медся ёна радейтö овны, сьöкыд висьтавны. Нярбордйöс позьö аддзывны гожöмнас Сыктывкарын и Печораын, Кулөмдінын и Мозын ю вылын. Сідзкө, паськыда олö-вылö.

Войясыс муртса лооны пемыдджыкось, нярборд быт-

тѣ тайѣс и виччысьѣ. Войбыд лѣбалѣ, куталѣ вугралысь номъясѣс да гебъясѣс. Кымыныськѣ сунгысьлас пемыд енѣжас. Тѣрыба вѣрѣны сылѣн бордъясыс.

Лѣптан кѣ зѣб йылѣ еджыд чышьян, пыр и казялас, кутас лѣбавны сы гѣгѣр. Корсюрѣ весиг пуксьывлѣ чышьян вылѣ. Ичѣт дырйи ми унаысь кутлывлѣм сѣйѣс тадзи. А ошйысьѣмыд мыйта, кодлы удайтчас кутны нярбордйѣс.

Кѣть и мисьтѣм сѣйѣ, а мортлы вѣчѣ уна буртор: гожѣм чѣжѣн бырѣдас пожтыр номъясѣс, гутъясѣс, мукѣдсикас посни гагъясѣс, кодъяс йѣзлы вайѣны уна лѣктор.

Луннас сѣйѣ узьѣ. Оз вольпась вылын да шоныд керкаын, а кѣнѣ веськалѣ, кытчѣ югыдыс суас. Ёнджыкасѣ пу горсьясын, чардакъясын, энѣвтѣм важ керкаясин. Да и узьѣ сѣйѣ аслысногѣн: мыджяс бѣр кокъяснас кутшѣмкѣ сюръя бердѣ, ѣшѣдчас увлань юрѣн и заводитас шойчыны. Воас рыт да, дзик пыр и садьмас. Тѣла кѣ да зѣра поводдя пуксьѣма, бѣр заводитас вугравны. Лѣк войяснад и номъяс да гутъяс оз лѣбавны, найѣ дзѣбсьѣмаѣсь щельясѣ, пу лапъяс улѣ. Нинѣм вылѣ оз энѣвтны шоныд местаясѣс. Сѣдзкѣ, нинѣм вѣчны татшѣм лѣк каднас и нярбордлы. Бурджык узяс кѣ, мѣд лун зѣльджыка кыйяс.

Во кык сайын телеграфнѣй проводѣ крукасис ѣти татшѣм нярборд. Ме казялѣ тайѣс да пыр жѣ котѣрті сѣтчѣ. Лѣптѣ кулѣм лѣбачѣс и шѣмѣсмунѣ. Нѣнъяс бердас топѣдчѣмаѣсь кык ичѣтик пи.

Дыр мысти нин тѣдмалѣ: вѣлѣмкѣ, лѣбалысь шыр пиянсѣ рѣдитѣм бѣрын мыйкѣ дыра, кор найѣ оз на кужны кыйсьыны, вѣдитѣ сьѣрсъыс, аслас нѣнъяс бердас.

Со кутшѣм дивѣторъяс эмѣсь лѣбачьяс олѣмад.





ЛЭБАЛЫСЬ УР

— Опонь, эн шумит, лок өд-йөджык татчө.

Афанасийлы мөдысь тшөктыны эз ковмы, здукон котөргіс вокыс дорө.

— Мый нө аддзин?

— Видзөд коз вылас, коді тай

неуна нөрөвтчөма миянлань.

— Нинөм ог аддзы.

— Видзөд бурджыка, дзик йылас со съөд ёкмыль тыдалө. Аддзан?

— Ур.

— Ур, сөмын аслыссяма.

— Ылөдлан. Чайтан, посняслы быдтор позьө сөрны? Миян учитель став зверь-пөткасө төдө, а мөдпөлөс ур йылысь некор на эз висьтавлы. Ой, вөрөшитчө, чечыштны көсйө.

Пу йылын пукалысь зверь бытьө кыліс кык воклысь сёрнисө, торйөдчис местасыс, паськөдіс бордьяссө и лэбзис орччөн сулалысь пу-вылө. Афанасий сулаліс да

видзодіс тайо бордъя зверь вылас. Ачыс пыр на эз эскы вокыслы. Кыдзи нө ур вермас лэбавны, кор сылөн некутшөм борд абу, эз-ө нин пушкыра бөжсьыс вөч тайо дивө-бордсө?

— Збыль тай, бордъяса сійө. Лэбавны кужө.

— Ме тай висьталі. Паляур тайо. Аслыссяма вөрса олысь. Кокъяс костас сылөн эм кучик. Кор көсйө пышыны, паськөдас сійөс и артмө борд. Сійө вермө лэбзыны өти пусянь мөдө вель ылөдз.

Паляур эз дыр манитчы пу вылын, паськөдіс бордсө, бара лэбзис мөд пуө, коді сулаліс зэв ылын.

Афанасий өдва вөтчис вокыс бөрся, коді сыысь вөлі ёна пелькджык и дас арөсөн ыджыдджык.

Кык вок дыр котралісны зверь нисьө пөтка бөрся. Медбөрын, дзыкөдз воштісны сійөс.

Афанасий ёна на дөзмөдчис вокыслы, юасис тайо аслыссяма зверь йывсьыс.

— Ме и ачым зэв этша төда сы йылысь,— вочавидзис вокыс.— Вот велөдчан да дядя Мишаыд мөз лоан охотоведөн, и сэки төдмалан паляур йылысь унатор.

Век жө Афанасийлы вокыс мыйскүрө висьталіс. Паляур, вөлөмкө, миян вөръясын паныдасьлө частө. Сійө медсясө олө войын, луннас радейтө тулан моз шойччыны пу горсьясын. Сөйө кызд пу гаръяс, вөрса дзоридзьяслысь көйдысьяссө, пожөм кольяс.

Сиктө лэччигөн Афанасий дыр на думайтіс лэбалысь ур йылысь. Аски школаын висьталас аслас другьяслы. Кодъяскө, колөкө, оз и кутны эскыны, мый талун аддзыліс сійө вөрысь.





*

ПОВЗЬОДЧЫСЬ

Эжва посёлоксянь неылын эм неыджыд Ерёмвад ты. Водз тулыснас быд во сэтчө пыралө. Сьорт полыйысь ваыс, а гожомнас тыыс бара кольö аскежас. Сöмын ёна зэрöм бöрын сэтысь писькөдчылö ичөтик шор.

Ерёмвад дорö тöдтöм йöз öдвакö вермасны пырны: берегыс кадъя, сідзи и виччысь, кор чурскысян-вöян коскөдзыд. Сэтчө позьö веськавны сöмын векныидик туйöд, кодöс уна во чöж вöчлісны маті сиктясын олысь чери кыйысьяс. Ты гөгöрыс быдмöны лябиник пуяс. Джуджыд эжөр да кузь пöляньяс сулалöны вутшьяс вылын. Тыыс джуджыд, эмöсь сэтшöм местаяс, сюян ва пытшкас кык лапта пелыс — некытчö оз подйив. И чериа сійö. Олöны сэнi гырысь сирьяс и ёкышьяс, кельчияс и гычьяс. Лэптан найöс вугыршатьöн ваысь, а найö сьöдöсь, мисьтöмöсь, киад босьтны полан. Да и аслыссяма тыыс. Мукöд дырйи лунтыр пукалан берег дорын, видлан уна места, а юква вылö немтор он кый. И луныс мича, и тöлыс шогмана, а чери оз шед.

Челядь дырйи öткөн ми некор эг лысьтöй матыстчывлыны тайö ты бердас, чукöртчам нельöн-витөн,—

сэки збойджыкось. А полім «васаысь», код йылысь часто висьтавлісны чери кыйысь пöляс. Коть сійос и некод абу аддзылöма, но сёрни вöлі уна. Васа олысь то косявлас кодлыськө вель тругубеч, то ызöбытлас ты шöрас сідз, мый гыясыс паськалöны берегöдз. Отнас сöмын эз пов сыысь Сьöрт грездса олысь Влас, ар нелямына ён морт. Гожся рытьясö сійö быд рыт воывліс ты вылö, вель дыр брутокдліс-повзьöдліс чериясöс кузь воропа ботанön. Кыяс ведратыр чери, зургас веткисö берег дорö и шутьялігтырйи мөдöднас керкаланьыс, коді сулаліс тысянь неылын, гажа нöрыс йылын.

Ми унаысь юавлывлім Власлысь, мыйла сійö лысьтö отнасön пырны ты шөрö, оз пов «васаысь», а сійö гиргöсералö: «Найö мед поласны, кодъяслөн юрыс пемыд. Некутшöм васа сэні абу, ставыс тайö сөрöм».

Та бöрын ми частöджык кутім воывлыны повзьöдчысь ты дорö, но пыжö пуксьыны, медым кыйсьыны шöрас, вель дыр на эг лысьтöй. А сэні рыт-асывсö дугдывтöг сялькөдчисны гырысь и посни черияс, быттö вильшасисны да корисны ас дінас.

Отчыд быдса кык вежон ми эг волöй Ерöмвад дорö. А кор лэччим выльысь, аддзим Власöс. Сійö пукаліс ты дорын да шпуткис-куритчис.

— Бур, мый воид, талун ме тіянлы верма петкөдлыны васа повзьöдчысьтö,— сэсся чеччис, нуöдіс мянös пыж дорас. Ми вöтчим сы бöрысь, эг төдöй, шмонитö сійö либö висьталö збыльтор.

Пыжас куйліс пызанысь на кузь сир, синьясыс көш пасьтаось, вомас быдса кушман төрас.

— Кыдзи нö татшöмсö лэптін?— юаліс менам ёртöй.

— Лэпті тай... Кык тругубеч косявліс, а коймөдас веськалі.

Ми дыр сулалім пыж дорын. Гундыр сир көть вöлі кулöма нин, пыр на полім матыстчыны сы дінö. Некор эг чайтлöй, мый татшöм ыджыд чери вермö лоны. Уна

жӧ пакӧсть сійӧ, кӧнкӧ, вӧчис тыын олысь мукӧд чери-
яслы.

Та бӧрын ми эгӧ нин кутӧй повны Ерӧмвад тыысь,
весиг вель частӧ пыжӧн петавлім ва шӧрас. Да и пов-
ныс, вӧлӧмкӧ, дзик немторйысь.





ЕФИМ ДА «ПОЛКАН»

Ми пукалім куд кодь ичөтик керка дорын да сёрнитім Ефим Иовлевичкөд. Өшинь улас сулалісны көрүв дадьяс. Ывлаын өвтө нин тулысөн. Вазьома войвывса джуджыд лым. Керка вевт вылын, кытчө ёнджыка веськалоны югөрьяс, тэрмасьомөн войталоны анькытш тусьяс кодь ва войтьяс.

— Сідзкө, регыд тундраө бара мөдөдчад?

— Поводдяыс со тэрмөдлө,— вочавидзис Ефим Иовлевич, и векныидик чужөм вылас, кытчө радөн-радөн водөмаось посныидик чуқырьяс, мыччысьліс нюм.

Уна вояс чөж йитчөма оломыс Ефим Иовлевичлөн тундракөд. Сэни и сійө чужлөма, веськыда чумас. Бать-мамыс, вокьясыс — ставныс уджалісны көрьяс дорын. Кагаён медводдза бөрдөмыс, первойя кывьясыс да серамыс бара жө колины сэтчө, тундраө.

Школаө мунтөдз на ичөтик Ефим аслас бать-мамкөд быд во кытшлаліс төдса тундра. Кор помаліс велөдчөм, бара энөвтис сикт да муніс сэтчө. Сэсса заводитчис война. Сметаниньяс семьяысь мунісны фронт вылө куимөн, медым видзны вөрөгысь чужан му. Батьыскөд

да Тимофей воыскөд нөйтис фашистьясөс и Ефим Иовлевич. Сйө тышкасис Киев мездөм вөсна, аслас ёртыяскөд вөтліс кортөм «гөстыясөс» Украинаса сиктыясысь да каръясысь. Сэсса сьөкыда ранитчис. Куим төлысь куйліс госпитальын. Гортас ковмис бергөдчыны көстыльяс отсөгөн.

Тундраө мунөм йылысь нинөм и вөлі думайтны. Колины төлысьяс... вояс... Быд пөрийө, кор ылі туйысь волісны көраяс, Ефим Иовлевичлөн майшасис сьөлөмыс.

«Эк, тундра, тундра, төдан кө тэ, кутшөма менам тэысь быри гажөй».

Век жө Ефим Иовлевич веськаліс тундраө. Некымын во нин сйө веськөдлө гөрд чумөн. Кольөм во ми ськөд бара аддзысьлім Ижмаын. Дыр пукалім сы ордын да варовитім тундраын олөм-вылөм йылысь. Сметанин аслас арлыд серти кажитчө пөрысьджыкөн. Тундраса сьөкыдлунъясыс вөчөмаөсь гожъялөм чужөм вылас асыныс пасьяс. Плеш водзыс заводитөма нин кушмыны, ыджыд ён кияс вылас зэвтчөмаөсь лөз сөнъяс.

Лөсьыд ськөд сёрнитны. Ефим бура төдө тундра, аслас мичлунъясөн, кратайтчөмъясөн. Сйө вель дыр чөв олыштіс, быттө чукөртчис мөвпъяснас, сэсса дыр мысти нин содтіс:

— Ог эски налы, кодъяс тундра йылысь гижөны, мый ставыс сэні мича да гажа. Ме эськө мөдарө шуи: тундраын вермасны уджавны сөмын медся повтөм да вына йөз. Сэні и паныдасьлө уна сьөкыдлуныс, көтасьлан, кынмылан сідз, кывтө шуны он вермы.

Кор ми прөщайтчим нин Ефим Иовлевичкөд, магазиньсь воис гөтырыс. Ськөд тшөтш керкаө пырис томник көр.

Көзяин казяліс миянлысь дивуйтчөмнымөс и заводитіс висьтавын:

— Тайө миян быдтас. «Полканөн» нимтім. Чужөм бөрас дойдіс коксө. Медым сйөс эз сөйны көинъяс, ми

вайим чумо. Гөтыр быд лун сійос вердіс шыдөн, няньон, ялаон. Көрпи заводитіс өдйө быдмыны, велаліс йөз дінө. Лэдзам вөлі гуляйтны, котралыштас мыйкө дыра и бөр локтас чумо.

Мича тайө көрпиыс: тушаыс ыджыд, бөжладорас паськыд сьод пас, кокъясас быттьө көмалөма еджыд чувки, плеш вылас кык ичөт сюр, голяс ярьюгыд серьяса көв йылын ошалө көлөкөльчик.

«Полкан» тэрмасьтөг кытшовтіс комнатаяссө, сэсса пырис кухняө да кутіс виччысьны, кор сійос вердас көзяйка. Регыд мысти өшинь улын кылісны челядь гөлөсьяс. Көрпи кывзысьыштіс, өдйө тотшиктіс өдзөс дорө да юрнас восьтіс сійос. Челядь чөсмөдлісны тундраса гөстьос быдсяма чөскыдторъяснас. Отяяс мыччөны сылы выя нянь, мөдъяс — преник-кампет. «Полкан» чатрөдлө юрсө, сөйө тэрмасьтөг. Ёнджыка кө пыркнитас юрнас, пыр жө кылыштас көлөкөльчиклөн шыыс. Нывкаяс да зонкаяс малалөны сійос, «Полканлы» гажа накөд. Вермис кө, колөкө, тшөтш сераліс аслас другьяскөд.

Кольө некымын лун, и «Полкан» көзяиныскөд бара мөдөдчасны тундраө. Найос кузь туйө колльөдны локтасны и Ижма сиктса челядь. Найө дыр өвтчасны ичөтик кияснаныс:

— Бур туй тэныд, «Полкан»!

— Выльысь аддзысьлытөдз, Ефим дядь! Эн вунөдөй миянөс тундраад!





КЫДЗ ПУ ВЫЛЫН СЬЫЛІС ЖОНЬ

Помтём-дортём парма вывті шывгисны мисьтём кымөръяс. Найо быттё көсйисны лэччыны муас, дзєбны паськыд эшкын улө вөр-васө. Вөралөм йылысь талун нинөм и думайтны: асыв-сяньыс енэжыс бөрдіс сьөд синваён. Дзєбсисны пөткаяс. Дугдісны сывны лэбачьяс, кодьяс

асывсянь рытөдз гажөдлісны пармасө.

Вөрсә ордымөд восьлаліс өтка морт, мудзөма, көтасьөма. Резинөвөй сапөг улас болскакыліс кизьөр няйт. Мунны сьөкыд. А зэр кисьтіс и кисьтіс.

Вөр керка тыдовтчис регыд. Чыкышов сійөс аддзис ылысянь на. Көрт листысь вөчөм трубаысь енэжлань пуркөдіс-кайис кизьөриник тшын. Сідзкө, позьө шонтысьны и косьтысьны.

Локтысьлы паныд петіс ичөтик тушаа шочиник тошка дед, коді оліс тані, видзис лесопунктлысь ломтас.

— Примит гөстьөс, дед,— шыасис Чыкышов.

— Лок, лок... Патератө нопьяд он вөдит.

Гость пөрччысис, заводитис косьтысьны. Пось чай да вина бутылка варовмөдісны Чикышовос и дедос. Вөралысь коймөд пөрийө нин ошйысис аслас кык ствола выль ружьенас. А пицалыыс сылөн и збылысь мича: ствольясыс югьялөны, лөжаыс пелькиник. Дед кывзө гөстлысь баквалитчөмсө, но вомавны яндысьө.

«Ошйысь, сыысь өд деньга оз ков мынтыны».

Ичөтик керкаын лои жар. Дед восьтіс өдзөссө. Зэрыс дугдөма нин. Быттьө тайө здуксө и виччысьөма, пасьтөм кызд вылө пуксис жонь да кутіс гажаа сьывны.

— Быд лун менө гажөдө,— сьылысьлань меліа видзөдліс дед, сэсся петіс керкасыыс да муніс пєсла. Эз на удит вөчны кызь воськов, мышладорас грымөбтіс лыйөм шы. Кызд пу вылысь уси сьылысь лэбач.

Дедлөн скөрмөмысла зэлалісны сөнъясыс, а гөсть быттьө дэльөдіс сійөс:

— Но, бур абу ружьеыс, дед?

Старик кызмырдөн матыстчис кызд пу дорө, лэптіс гөрд морөсаөс. Сы вомысь петіс вир. Дед пуктіс сійөс ки пыдөсас да дыр сулаліс тадзи, сэсся кодйыштіс сапөг бөрнас ичөтик гуран, лэдзис сэтчө лыйөм жоньөс, кагаөс моз тубыртіс сійөс пу корьяс пытшкө да гуаліс.

— Эх, тэ.. Пицаля морт... Кыптіс тай кийд... Узыны эн лөсьөдчы. Ог лэдзі!— вазьөм синьясас тыдаліс сы мындөм скөрлун, мый пицаля морт весиг бөрыньтчис.

Вөрсә стөрөж пуктіс черсө киняулас да надзөникөн восьлаліс тшемөн сулалысь вөр пытшкө. Бөрсө сійө эз бергөдчы зэв дыр. Чикышовлы, дерт, эз вөв окота зновтны шоньд керкасө, но и кольччыны эз позь. Ковмис пасьтасыны, мунны.

«Гөститөді, юкталі, а кутшөмкө жонь вөсна вөтліс»,— думнас видчис Чикышов.

Но быть лои мунны.

12752

ДЛЯ СРЕДНЕГО И СТАРШЕГО ШКОЛЬНОГО ВОЗРАСТА

Иван Васильевич Коданев

РАНО ВСТАНЕШЬ — БОЛЬШЕ УВИДИШЬ

Рассказы о природе

На коми языке

* * *

Художник М. П. Безносоев

Редактор В. А. Попов


Техн. редактор И. И. Оплескин

Сдано в набор 24/II-1967 г. Подписано к печати 10/VI-1967 г. Бумага № 2.
Формат 70×108^{1/32}. Бум. л. 1.3. Печ. л. 3.59. (Уч.-изд. л. 3,11.) Зак. № 2194.
Тираж 1800. ЦО0800. Цена 9 коп. Коми книжное издательство, г. Сыктывкар,
Дом печати.

* * *

г. Сыктывкар, Республиканская типография Управления по печати
при Совете Министров Коми АССР.

9 коп.



КОМИ КНИЖНОЙ ИЗДАТЕЛЬСТВО 1967